

## **NA KEKEDELA A PAUL FUANA SOEFAATAIA I ROM**

<sup>1</sup> Na kekedelaa faasia a Paul na wane raoa a Christ Jesus. Nau ta aposol sulia a God e aadafili nau ma ka soe nau uria na ainitalolaa ana Faarongolaa Diana.

<sup>2</sup> Na Faarongolaa Diana naa a God e bae aalualu ana e tau ua na mai i nao si kada na profet gi gera kedea laona Kekedelaa Aabu. <sup>3</sup> Ma na Faarongolaa Diana nae sulia na Wela nia a Lord gia a Jesus Christ. Nia e futa mai ana kwalafaa a David na aofia ka hau ana wane.

<sup>4</sup> Haia, gia haitamana nia a God Aabu sulia God e faamamana nia na Wela nia si kada a God e tataea faasia maea ana mamanaa baita nia. <sup>5</sup> Ma ana a Christ, God ka faadianaa nau haia kuka aalua aposol uria raolaa fuana a Christ, eeri kuka talaia tooa ana fera gi sui hai gera ka manata mamana ani nia ma daka roosulia na baelana.

<sup>6</sup> A God e dooria kuka talai gamu laugo na tooa na mu too i Rom, sulia God e soe gamu hai muka aalua tooa a Jesus Christ gi.

<sup>7</sup> Haia, i nia naa e aade nau ku kekede fuagamu sui go na tooa na mu too i Rom na God e rakediana fuagamu ma ka soe gamu haia muka aalua na tooa nia.

Nau ku fooma eeri a God na Maa gia ma a Lord Jesus Christ ka faadiana gamu ma ka falea na fanualama fuagamu.

*Fooolaa ni baelafea.*

<sup>8</sup> Doo totongenao, nau ku baelafea God nau i sulia Jesus Christ fuagamu sui, sulia tooa gi ana fera oro la molaagali loulou da rongo sulia sui naa na fiiamanalaa gamu. <sup>9</sup> A God nia haitamana si taa gi na ku haea nia mamana. Nia na God na ku rao mai fuana ana na mourilagu sui ana ainalongailana Faarongolaa Diana sulia Wela nia. God ka haitamana nau ku manatatoogamu, <sup>10</sup> ana si kada gi sui ku fooa ana gi. I nau ku gania God, lea nia ka dooria, tara ka falea taa waludalaa fuagu hai kuka lea mai uria daotoolaa gamu ana si kada nae. <sup>11</sup> Sulia nau ku dooria asianaa haia kuka riki gamu, eeri kuka ado fai gamu ana si falea gi faasia na Aanoedoo Aabu a God uria faarigitalaa gamu. <sup>12</sup> Sulia nau ku dooria hai golu ka adomi golu kwailiu, tara nau ku adomi gamu ana fiiamanalaa nau, ma i nau muka adomi nau ana fiiamanalaa gamu.

<sup>13</sup> Haia oote waihaasi nau gi ae, muka manatoona laugo, kada oro gi na nau ku manata uria daotoolagamu, ma si kada gi sui ku daotoona e afetaia uria iililana. I nau ku dooria lealaa kou siamolou haia teni tooa lau na da too i Rom daka manata mamana ana Christ, iilingia ku iilia laugo fuana tooa aai ana maefera tooa maadiu gi. <sup>14</sup> Sulia nau na wane rao uria adomilana tooa gi sui, tooa gi na da haitamadoo ma gera ka too ana toolaa faalu, ma na tooa na langi dasi haitamadoo ma daka too ua ana toolaa gera baa mai nao. Ta'a asianaa fuana nau, lea kuka noni eela uria ainalolaa fuana tooa gi sui. <sup>15</sup> Nia na e aadea kuka dooria ainalolaa ana Faarongolaa Diana fuagamu laugo tooa na mu too i Rom.

*Na mamanaa ana Faarongolaa Diana.*

<sup>16</sup> Haia, nau langi kusi ida ana baelaa sulia na Faarongolaa Diana naa, sulia ana mamanalana na Faarongolaa Diana a God e faamouria na tooa gi na da manata mamana. Urinae, a God e falea na Faarongolaa Diana fuana tooa i Jiu gi i nao, ma sui fuagera tooa maadiu gi laugo.

<sup>17</sup> Sulia na Faarongolaa Diana e faatai folaa na ana malutana a God uria olosilana na tooa. Ma nia ka olosia na tooa sulia gera manata mamana go ada ana Christ. Langi lau ta doo ete na a God e olosia na tooa gi ana. Sulia si doo nae baa na Kekedelaa Aabu ka urii, <<Na tooa gi na a God e olosida sulia na fimamanalaa gera, tara gera ka mouri.>>

*Na aade ta'alaa gera tooa gi sui.*

<sup>18</sup> Ma a God mai i langi ka faatainia na rakehasua nia fuana tooa gi na gera aadea doo ta'a gi ma gera ka aaburongo ani nia. Ma ana na aade ta'alaa gera gi gera ka suusia na tooa aai gi hai gera ka langi si haitamana na faarongolaa mamana. <sup>19</sup> A God ka falea na kwakwaelaa fuada, sulia nia e faatai folaa ana doo gi suli nia i talana, ma ka faawaluda fuada uria haitamalana.

<sup>20</sup> Ana hafalilana mai God e haungainia na molaagali, na tooa gi daka haitamana naa na mamanaa nia na e langi kasi sui, ma daka haitamana laugo nia na God mamana. Sulia boroi ana na tooa gi langi dasi bobola uria rikilana a God, gera ka haitamana daka rikia na doo gi na nia e haungaida, ma nia naa e aadea gera ka haitamana na doo gi sulia a God. Ma sulia nia urinae, e afetai go gera ka

haea gera lalafusia a God. <sup>21</sup> Gera haitamana a God, ma langi dasi dooria go na faabaitalana, ma langi dasi dooria go na baelafelana uria na doo gi na nia falea fuada. Ma si kada gera manata, langi dasi manata go sulia tesi doo, sulia na manatada e gwou naa ma na manatalaa gera gi ka rorodoa naa. <sup>22</sup> Haia, gera haea gera tooa liotoo, ma gera na tooa oewanea gi go ana. <sup>23</sup> Ma langi gera kasi fooasia go a God na e totoo firi, ma gera ka fooasia ada nunuidoo gi na gera haungainia go ada ana mala nununa iimola gi ma na manu gi ma na doo fai ae gi ma na doo aangoango gi.

<sup>24</sup> Haia, sulia na doo nae gi, a God e lugasi gera hai daka lea na ada sulia doorilaa gera gi, ma gera ka iilia na doo ta'a gi fuada kwailiu ana nonida. <sup>25</sup> Gera ka oote gera ana manata mamanalaa ana na mamanaa sulia a God, ma gera ka manata mamana ada ana na sugea gi. Ma gera ka fooasia na ada ma daka rao na ada fuana na doo a God e haungaida gi. Ma langi gera si fooasia a God na e haungainia na doo nae gi sui, ma langi gera si roosulia. Taifilia nia e bobola fuana tooa gi gera ka baelafea ka tau firi. Amen!

<sup>26</sup> Ma i sulia na aabulolaa na tooa gi ka ta'a urinae, a God ka lugasi gera eeri gera ka iilia na doo ni idalaa gi na da lea sulia na kwaidoorilana nonida. Ma na geni gi laugo, gera ka oote gera na ada ana na wane gi haia daka teo na ada fai nia na geni gi lau. <sup>27</sup> Ma e urinae, na wane gi laugo daka lugasia na ada na geni gi ma gera ka dooria na ada uria teolaa fai nia na wane gi lau. Ma e urinae, na wane gi gera ka iilia na ada na doo ni

idalaa na fuada kwailiua. Nia naa tara gera ka ngalia na kwakwaea na e bobola fuada sulia na aabulo ta'alaa gera gi.

<sup>28</sup> Ma sulia na tooa nae gi da oote gera ana taa naa e bobola uria haitamalana sulia a God, nia ka lugasi gera hai gera ka manata ta'a na ada ma gera ka iilia na ada doo gi na e langi si diana fuana gera ka iilida. <sup>29</sup> Sulia gera ka iilia na doo ta'a gi ka tau naa, ma gera ka aanau, ma gera ka aadea ta'alaa fuada kwailiu, ma gera ka kwaifii, ma gera ka hauwane, ma gera ka firufiru, ma gera ka suge, ma gera ka kwaibalafaafi, ma gera ka uunuunua dongaa. <sup>30</sup> Ma gera ka bae ta'a sulia gera kwailiu, ma gera ka susuala fuana a God, ma gera ka bae ta'a fuada kwailiu, ma gera ka lafe, ma gera ka tango gera i talada asianaa, ma gera ka manata asianaa uria na iililana doo ta'a gi lau, ma gera ka aaburongo fuana na maa fai nia ni tee gera gi. <sup>31</sup> Ma si kada gera iilia doo ta'a, langi dasi liobukonu, ma langi gera kasi faamamanaa na bae aalualulaa gera gi, ma langi gera kasi rakediana ma langi dasi kwaimanatai fuana na tooa ete gi. <sup>32</sup> Haia, ma gera haitamana na kwaieresia a God gi e haea na tooa na da too urinae, e bobola uria maelaa. Sui boroi ana urinae, gera ka tasa dongaa go ada uria iililana doo nae gi, ma gera ka dooria fuana tooa ete gi laugo gera ka iili doo urinae gi.

*Na keketoa a God.*

## 2

<sup>1</sup> Haia, ma ni gamu na mu keketoa na tooa gi na da aade ta'a urinae, muka keto gamu i talagamu

laugo. Sulia gamu laugo mu iilia laugo agamu na doo ta'a gi na gera iilia, ma e afetai muka tofea haso gamu langi musi garo. <sup>2</sup> Ma gia sui go gi haitamana na keketolaa a God nia o'olo ana si kada nia ketoa ana tooa na da iilia ana doo urinae gi. <sup>3</sup> Haia, ma sulia gamu mu iili laugo iilingia na tooa na mu ketoda, langi musi manata hasa a God tara ka langi si keto gamu laugo. <sup>4</sup> Ni gamu boro manata garo hasa a God ka langi si keto gamu, sulia nia rakediana baita fuagamu ma ka gwaromaabe fuagamu laugo. Haia, diana fuana muka haitamana go agamu na a God e iili diana urinae fuagamu eeri muka oolitai manata faasia aabulo ta'alaa gamu gi.

<sup>5</sup> Ma sulia langi musi dooria go oolitai manatalaa, urinae gamu i talagamu laugo ana na mu faabaitaa na kwakwaelaa gamu gi fuana fe Dani a God tara ka faatainia na rakehasua nia ma na tooa gi sui tara daka rikia na keketolaa o'olo nia. <sup>6</sup> Sulia a God tara ka falea na doo gi fuana tooa gi sui sulia na raolaa e'ete gera gi. <sup>7</sup> Teni tooa, a God tara ka falea na mouria firi fuada, sulia gera tasa dongaa ana iililana na doo diana gi ma gera ka dooria a God ka baelafeda ma ka falea initoo fuada fai nia na mouria firi. <sup>8</sup> Haia, ma teni tooa gi da hasi uria ngalilana na doo gi na gera dooria, ma gera ka oote gera ada ana taa gi na e o'olo, ma gera ka dooria ada lealaa sulia si taa gi na e garo. Ma sulia gera na da urinae, a God tara ka faatainia na rakehasua nia fuada ma ka falea na kwakwaelaa baita fuada. <sup>9</sup> Haia, ma ni tei gera na da iili doo ta'a, tara gera ka too ana afetaia ma na filaa. A God tara ka iili urinae fuana na tooa i

Jiu gi ma fuana na tooa maadiu gi laugo. <sup>10</sup> Ma a God tara ka falea na initooa ma na babaitaa ma na fanualama fuana ni tei gera na da aadea taa gi na e diana. Nia iili urinae fuana na tooa i Jiu gi ma fuana na tooa maadiu gi laugo. <sup>11</sup> Sulia na keketolaa a God fuana na tooa gi sui nia o'olo, ma ka langi si garo fuana ta iimola.

<sup>12</sup> Haia, na tooa maadiu gi langi dasi haitamana na kwaieresia gi faasia a Moses. Ma sulia gera iilia na doo ta'a gi, tara a God ka ketoda. Sui taa, a God ka langi si ketoda ana na kwaieresia nae gi. Nia e ketoda uria maelaa, sulia na aade ta'alaai gera gi. Ma na tooa i Jiu gi mone da haitamana na kwaieresia gi faasia a Moses. Ma a God tara ka ketoda, sulia gera iilia na doo ta'a gi ana aaburongolaa ana na kwaieresia nae gi. <sup>13</sup> Sulia e langi lau na rongolana kwaieresia gi na tara ka olosia na tooa gi fuana a God, ma iililana na taa gi na kwaieresia gi e haea taari. <sup>14</sup> Na tooa maadiu gera si haitamana na kwaieresia gi. Sui ma lea gera iilia si doo sulia na kwaimadamilaa gera ma ka lea sulia na kwaieresia, gera faatainia na kwaieresia gi e too i laona lioda, sui boro ana langi dasi rongoa ua na kwaieresia nae gi. <sup>15</sup> Haia, na aabulolada e faatainia na kwaieresia e too naa i laona na lioda. Haia, na manatalaa gera laugo ka faatainia si doo naa nia mamana, sulia si kada gera iilia na doo ta'a gi, gera ka liobukonu, ma si kada gera iilia na doo diana gi, gera ka eele. <sup>16</sup> Haia, ma na keketolaa nia a Jesus Christ e urinae ana fe Dani nia tara ka adomia a God ana ketolana na tooa sulia na manataa aagwa lao liogera. Nia na Faarongolaa Diana na

nau ku bae sulia e haea.

*Na tooa i Jiu gi ma na kwaieresia gi faasia a Moses.*

<sup>17</sup> Haia, ma ni gamu tooa i Jiu gi, molu ka dooria alangi gamu i talagamu ana <<tooa i Jiu gi>>, ma langi musi mou sulia muka too ana na kwaieresia gi faasia a Moses, ma muka baelafe gamu i talagamu sulia muka haitamana a God. <sup>18</sup> Ma gamu ka haea muka haitamana taa na a God e dooria fuana muka iilia, ma muka haitamana aadafililana si doo na e o'olo sulia gamu haitamana na kwaieresia gi. <sup>19</sup> Ma gamu ka haea laugo, mu haitamana talailana tei gera na da iilingia tooa maa rodo sulia gera lafusia a God. Ma gamu ka haea laugo, gamu mu iilingia na kwesu fuana tei gera na da too laona rorodoa eeri gera ka lea siana a God. <sup>20</sup> Muka haea gamu na tooa faatolomai gi fuana na tooa oewanea ma fuana tooa gi na dasi haitamadoo. Ma muka haea mu too ana na haitamadoo loulou ma na doo gi sui na e mamana, sulia muka too ana na kwaieresia gi faasia a Moses. <sup>21</sup> Haia, gamu haitamana faatolomailana na tooa ete gi, ma utaa naa langi musi faatolomai gamu i talagamu? Muka bae fuana tooa gi urii, <<Langi musi beli.>> Haia, ma ni gamu i talagamu muka beli agamu laugo. <sup>22</sup> Muka haea laugo fuana tooa, <<Langi musi ooe.>> Haia, ma i gamu muka ooe agamu. Muka haea laugo, na nunuidoo gi na tooa gi gera foasia e ta'a asianaa. Haia, ma ni gamu mu ruu lao beu ni foalaa gi, muka belia agamu na nunuidoo nae gi. <sup>23</sup> Ma gamu mu lafe gamu i talagamu sulia mu too ana na kwaieresia a God



gi. Haia, ma ni gamu muka aaburongo agamu ana na kwaieresia nae gi. Ma nia na aadea na tooa gi gera ka bae ta'a ana a God. <sup>24</sup> Urinae na Kekedelaa Aabu e bae urii, <<Sulia gamu na tooa i Jiu gi muka iili ta'a, na tooa na langi dasi Jiu gi gera ka bae tataga ana a God.>>

<sup>25</sup> Haia, lea so muka lea sulia na kwaieresia a God gi, na ole-marikolaa na mu iilia na doo diana. Ma lea langi musi lea sulia na kwaieresia nae gi, na ole-marikolaa na molu iilia boro e afetai ka adomi gamu, ma ni gamu muka iilingia go agamu na wane gi na e langi dasi ole-mariko. <sup>26</sup> Haia, ma lea ta wane na langi kasi Jiu ma langi si ole-mariko, ma ka roosulia na kwaieresia nae gi, a God tara ka haea nia bobola fai nia wane ole-mariko. <sup>27</sup> Ma e urinae gamu na Jiu gi, sulia na tooa maadiu gi tara daka faatainia a God tara ka keto gamu. Sulia mu aaburongo ana na kwaieresia gi, sui boro ana muka too ana na kwaieresia ni kekedelaa nae ma muka ole-mariko, ma gera ka roosulia na kwaieresia gi, sui boro ana langi dasi ole-mariko. <sup>28</sup> Sulia tei naa ta wane Jiu mamana? Nia langi ta wane na e ole-mariko go ana ana na nonina, ma na liona ka ta'a ua. Sulia na ole-marikolaa langi lau fuana na nonina taifilia. <sup>29</sup> Na wane mamana i Jiu ta wane go ana na mourilana e o'olo maana a God, sulia iilingia a God e ole-mariko ana na liona. Ma na raoa uria olosilana na mourilaa na wane urinae, na raoa nia na Aanoedoo Aabu, ma na raoa na kwaieresia gi ka langi. Na wane urinae, a God ka baelafe nia, sui boro ana na tooa gi dasi baelafe nia.

### 3

<sup>1</sup> Haia, taa diana naa fuana tooa gi i Jiu? Ma na taa diana naa e nii ana ole-marikolaa?

<sup>2</sup> Haia, doo oro asianaa ana si doo nae gi. Si doo totongenao, a God e falea na baelana fuana tooa i Jiu gi. <sup>3</sup> Ma boro'i ana na bali ada na Jiu gi langi dasi manata mamana ana baelana a God, e afetai a God ka langi si iilia si taa naa nia e bae aalualu ana. <sup>4</sup> Sulia a God e mamana, sui boro'i ana tooa gi gera ka suge. Sulia na Kekedelaa Aabu e haea urii, <<Ana si kada o bae ana, tooa gi sui da haitamana na baea oe gi nia mamana asianaa. Ma lea ta iimola ka feengi oe, tara oe oko saitasa.>>

<sup>5</sup> Ma nia naa tee soeledilaa na e ooewanea ka urii, <<E utaa, lea so na aade ta'alaa gia gi e faatai folaa ana a God nia na o'oloa, tama a God e garo si kada nia falea na kwakwaea fuaga?>> <sup>6</sup> Langi go! Sulia afetai a God ka langi si o'olo, sulia lea so nia kasi o'olo, nia kasi bobola uria ketolana na tooa gi.

<sup>7</sup> Haia, ma ta soeledilaa lau na e ooewane e urii, <<E utaa, lea so gia ka susuge, na tooa da riki diana hasa a God langi kasi suge, ma nia na aadea gera ka baelafe nia? Lea urinae, utaa naa a God ka keto nau si kada kuka suge iilingia ta iimola na e fualangaa?>> <sup>8</sup> Ma baelana nae nia ooewane laugo urii, <<Golu iili ta'a agolu eeri doo diana ka dao mai.>> Teni tooa daka feengi nau ana ku haea si doo naa. Haia, na tooa nae tara a God e keto gera.

*Langi ta iimola si o'olo.*

<sup>9</sup> Haia, ma uri gami na tooa i Jiu gi, na toolaa gami ma na aabulolaa gami e diana faasia na tooa maadiu gi? Langi go! Sulia nau ku faatania sui naa, na tooa i Jiu gi ma na tooa maadiu gi gera bobola sui go ada ana toolaa i farana na mamana ana doo fualangaa. <sup>10</sup> Sulia na Kekedelaa Aabu nia haea, <<Langi ta iimola si o'olo, <sup>11</sup> ma e langi ta iimola si liotoo ma langi so ka dooria fooasilana a God. <sup>12</sup> Sulia gera sui go da aabulo faasia a God, ma daka lea garo ma ta iimola si iilia go tesi doo na e o'olo. <sup>13</sup> Na fakada ka iilingia ta kwaingeia na langi dasi suufaafia ana gano, sulia na baelada e ta'a asianaa. Gera haea doo ta'a gi na e langi si mamana ana meada. Ma na baelaa haungilana na dao gi faasia na ngiduda iilingia na loi a'ala gi. <sup>14</sup> Ma na baelada laugo ka fungu ana kwalalaa na e ta'a asianaa. <sup>15</sup> Ma na tooa naa gi gera ka hasi uria faafilaa ma na hauwaneana. <sup>16</sup> Ma so i fai na gera lea ana, gera ka labasia na mone na doo gi ma daka falea asianaa na fiilaa fuana tooa gi. <sup>17</sup> Ma na fanualama ka langi si too la mourilada. <sup>18</sup> Ma gera ka langi si haitamana go na hae baitalaa fuana God.>>

<sup>19</sup> Haia, golu haitamana na doo gi sui go na da kededa la kwaieresia gi na doo fuana na tooa i Jiu gi na da too i farana kwaieresia gi, eeri langi ta iimola kasi haea nia langi si iilia ta'ala, sulia na tooa gi sui go da bobola uria a God ka keto gera. <sup>20</sup> Sulia e langi ta iimola si o'olo maa ana God sulia na iililaa sulia taa naa na kwaieresia gi e dooria. Haia, na kwaieresia gi e too eeri na tooa daka haitamana gera fualangaa.

### *God e olosia na tooa gi.*

<sup>21</sup> Haia, ana si kada nae, a God e faatainia utaa ana nia olosia na tooa gi. Ma ka langi lau na doo ana na kwaieresia gi, sui boro'i ana na kwaieresia gi faasia a Moses ma na profet gi gera ka faamamana. <sup>22</sup> A God e olosia na tooa gi sulia na fiamamanalaa gera ana Jesus Christ. Nia iili urinae fuana tei gera sui go na da manata mamana ana Christ, sulia langi go ta e'etelaa i matangana tooa gi. <sup>23</sup> Na iimola gi sui go da aade ta'a, ma daka kukuru faasia na dianalaa nia a God. <sup>24</sup> Ma sulia na rakedianalaa nia a God na e falea o'oni go ana, nia e olosida ana kwaisuusilaa nia a Christ Jesus na e faanonilaa gera faasia na aade ta'ala'a gera gi. <sup>25</sup> A God ka falea mai a Jesus Christ haia ka kwaisuusi ani nia ana maelana, eeri a God ka manata lukea na aade ta'ala'a gera tooa gi sulia na manata mamanalaa gera ani nia. A God e iili urinae eeri ka faatainia na ketolaa nia e o'olo asianaa, sui boro'i ana ka tau na mai nia langi kasi falea ta kwakwaelaa fuana tooa gi sulia nia e gwaromaabe. <sup>26</sup> Haia, si kada naa a God ka falea na kwakwaelaa fuana a Christ eeri ka faatainia a God naa e o'olo. Urinae a God ka faatainia nia e o'olo ma ka olosia na tooa gi na gera manata mamana ana Jesus.

<sup>27</sup> Haia, ma na taa naa tara golu ka lafe ana? Langi go! Sulia e langi golu si bobola uria haelana hasa golu o'olo sulia golu roosulia na kwaieresia gi. Sulia a God e olosi golu taari sulia golu manata mamana ana Jesus. <sup>28</sup> Sulia golu haitamana a God e olosia na tooa gi sulia na manata mamanalaa gera, ma langi lau sulia

na roolaa sulia taa naa kwaieresia gi da haea. <sup>29</sup> Haia, ma a God e dooria fuana taifilia Jiu gi da fooasia? Langi! Sulia a God dooria laugo hasa na tooa gi na dasi Jiu gi da fooasia. <sup>30</sup> Sulia a God tee God go, ma nia haitamana ka olosia tooa i Jiu gi lea so gera ka fiimamana, ma nia haitamana ka olosia laugo tooa maadiu gi lea so gera ka fiimamana. <sup>31</sup> Haia, nia urinae golu ka lugasia agolu na kwaieresia gi sulia na fiimamanalaa? Langi. Ma lau ana, golu ka faamamanaa na kwaieresia gi.

### *Sulia a Abraham.*

## 4

<sup>1</sup> Haia, na taa naa tara gia ka haea sulia a Abraham na koo gami kwalafaa i Jiu? Utaa naa a God ka olosi nia? <sup>2</sup> Lea so a God ka olosia a Abraham sulia si raa gi na nia e iilida, a Abraham e haitamana ka lafe sulia. Sui ma nia langi kasi bobola uria lafelaa i maana a God. <sup>3</sup> Sulia na Kekedelaa Aabu e haea urii, <<Abraham e manata mamana ana God, ma i sulia na fiimamanalaa nia na God ka haea a Abraham e o'olo.>>

<sup>4</sup> Ana si kada ta iimola ka rao, nia ka ngalia folilaa. Ma na malefo naa nia ngalia, na wane baita nia kasi falea o'oni ana, sulia na wane naa e rao ka bobola uria ngalilana folilaa nia. <sup>5</sup> Haia, langi kasi urinae ani gia si kada a God e olosi gia sulia na manata mamanalaa gia. Sulia e langi lau sulia na raolaga na a God e olosi gia, ma sulia na fiitoolaa gia ana a God taari na nia ka haitamana olosia na tooa ta'a gi. <sup>6</sup> Si doo nae

na malutana na baelana David ana si kada nia bae sulia na eelelaa na tooa gi na God e haea gera o'olo, langi lau sulia si taa gi na da iilida. A David ka bae urii, <sup>7</sup> <<Oilakea fuana ni tei gera na a God e manata lukea na garolaa gera gi ma ka lafua na aade ta'alaa gera gi. <sup>8</sup> Oilakea laugo fuana iimola na a Lord e langi si manata fuana aade ta'alaa nia gi.>>

<sup>9</sup> Na eelelaa nae na a David e bae sulia, na doo gera go ana tooa gi na da ole-mariko gi naa? Langi! Na doo gera laugo tooa na langi dasi ole-mariko. Sulia na Kekedelaa Aabu baa e haea, <<Abraham e manata mamana ana God, ma sulia nia e fiimamana, a God ka haea nia e o'olo.>>

<sup>10</sup> Ana si kada taa na a God e haea a Abraham nia o'olo? Buiria nia e ole-mariko sui ma langi si kada nia si ole-mariko ua? I nao ua suifetei nia kafi ole-mariko. <sup>11</sup> A Abraham e ole-mariko naa i buri. Ma na ole-marikolaa nia naa na mamalafooa haia ka faatania a God ka haea nia na wane o'olo sulia na fiimamanalaa nia suifetei nia kafi ole-mariko. Nia naa aadea a Abraham ka iilingia koo fuana tei gera na da manata mamana ana God ma daka hau ana iimola o'olo gi, sui boroi ana langi dasi ole-mariko. <sup>12</sup> Ma nia na koo gera laugo tei gera na da ole-mariko ma gera ka fiimamana, langi lau sulia gera ole-mariko, ma sulia gera manata mamana iilingia na koo gia a Abraham e iilia suifetei nia kafi ole-mariko.

<sup>13</sup> A God e bae aalualu ana fuana Abraham ma na kwalafaa gi, nia ka haea na molaagali naa tara na doo nia. A God ka bae aalualu urinae langi lau sulia Abraham e roosulia na kwaieresia gi, ma sulia nia e manata mamana ma God ka haea nia e o'olo. <sup>14</sup> Sulia lea so na bae aalualulaa na God

doo fuana tei gera na da roosulia na kwaieresia gi, tama na manata mamanalaa gera na iimola gi na doo o'oni go ana ma na bae aalualua na God na doo tatagwai go ana sulia langi ta iimola si bobola uria roosulilana na kwaieresia gi. <sup>15</sup> Haia, na kwaieresia gi na e falea mai na rakehasua a God. Ma lea so ka langi ta kwaieresia, ka langi gia si aaburongo go ana.

<sup>16</sup> Haia, a God e bae aalualu fuana a Abraham sulia na fimamanalaa nia, eeri ka faatainia na bae aalualua nia nae sulia na kwaimanatailaa nia ma tara ka falea o'oni ana fuana kwalafaa nia Abraham. Ma na kwalafaa nia Abraham, gera langi na taifilia tooa na da roosulia na kwaieresia gi, ma na tooa gi laugo na da manata mamana iilingia a Abraham. Sulia Abraham nia na koo gia sui, na tooa i Jiu ma na tooa maadiu gi. <sup>17</sup> Sulia na Kekedelaa Aabu nia haea, <<I nau ku aalu oe oko aalua na kwalafaa fuana tooa gi ana fera oro gi.>> Ma golu ka haitamana laugo i nia na kwalafaa golu i maana God na a Abraham e manata mamana ana. Nia naa, a God ka falea mouria fuana tooa gi na da mae, ma ka bobola uria haungailana na doo gi na langi si too ua mai nao. <sup>18</sup> Haia, ma a Abraham, boro ana nia e afetai fuana a God ka faamamana na bae aalualua nia, a Abraham e manata mamana ma ka fiitoo hasa a God tara ka faamamana na baelana. Ma si kada a Abraham e manata mamana urinae, nia ka hau ana na kwalafaa fuada na tooa la fera oro gi, iilingia na Kekedelaa Aabu e haea, <<Na kwalafaa oe gi tara ka oro iilingia na orolana na bubulu i mamangaa.>> <sup>19</sup> Ma boro ana a Abraham ka garangia ka

talange fe ngali na ana, na fiimamanalaa nia e langi kasi makeso si kada nia manata sulia ana nonina e makeso, ma laugo ni Sara ka aba'ato. <sup>20</sup> Ma na fiimamanalaa nia kasi langi ana faasi nia, ma langi kasi manata hala ana bae aalualua a God. Nia ka rigita sulia na manata mamanalaa nia, ma ka baelafea a God. <sup>21</sup> Sulia nia ka haitama diana ana tara a God ka bobola fai nia iililana si doo na nia e bae aalualu ana. <sup>22</sup> Nia naa sulia fiimamanalaa nia, a God ka alangi nia ana na wane o'olo. <sup>23</sup> Ma si kekedelaa urii, <<A God ka alangia ana na wane o'olo,>> langi lau fuana taifilia. <sup>24</sup> Sulia gera kede a laugo fuaga na a God ka alangi gia ana tooa o'olo gi, sulia gia ka manata mamana ana a God na e taea a Jesus na Lord gia faasia na maea. <sup>25</sup> A God e fale nia mai hai ka mae sulia na aade ta'alaa gia gi, ma a God ka taea laugo uria na mouria eeri ka olosi gia.

*God e olosia na tooa gi.*

## 5

<sup>1</sup> Si kada naa, gia too ana na fanualama fai nia a God sulia na raoa a Jesus Christ na Lord gia e iilia. Nia e urinae sulia a God e olosi gia sulia na fiimamanalaa gia. <sup>2</sup> Ma sulia gia ka fiimamana, a Christ e ngali gia siana a God eeri ka rakediana fuaga ma ka faadiana gia. Ma sulia e urinae, gia ka eele asianaa sulia gia ka fiitoo hasa tara gia ka initooa fai nia a God. <sup>3</sup> Ma langi lau na doo diana gi go ana gia ka eele sulia, ma gia ka eele laugo si kada gi ana afetaia, sulia gia haitamana na afetaia doo uria faarigitalaga eeri gia ka tasa dongaa ana manata mamanalaa. <sup>4</sup> Ma



lea gia ka tasa dongaa urinae, tara a God ka eele suli gia. Ma ana si kada a God ka eele suli gia urinae, gia ka fiitoo hasa tara a God ka faadiana gia. <sup>5</sup> Ma na fiitooa nae, afetai fuana a God ka langi si faadiana gia. Sulia a God e faatainia ana rakedianalaa nia fuaga ana na Aanoedoo Aabu na nia e falea fuaga.

<sup>6</sup> Gia haitamana a God e rakediana fuaga, sulia ana si kada afetai gia gi adomi gia i talaga, a Christ e mae usia gia tooa ta'a gi, ana si kada na God e aadafiliala. <sup>7</sup> Nia e afetai so ta iimola ka mae uria adomilana ta wane o'olo. Boro ta wane na ana oto mone haia ka mae fuana ta wane na e diana. <sup>8</sup> Haia, a God e faatainia sui naa na rakedianalaa nia fuaga, sulia ana si kada na mourilaga e ta'a ua, a Christ ka mae usi gia. <sup>9</sup> Ana na kwaisuusilaa nia a Christ ana maelana, a God ka olosi gia naa. Lea urinae, tara a Christ ka adomi gia ka tasa eeri gia ka mouri faasia na kwakwaelaa a God. <sup>10</sup> I nao mai, gia na maalimaea a God gi, sui nia ka ruana fai gia sulia na maelana na Wela nia. Ma sulia gia na ruana a God gi, i nia tara ka faamouri mamana ani gia sulia a Christ e mouri lau. <sup>11</sup> Haia, ma langi lau si doo naa go ana na gia ka eele ana. Ma gia ka eele laugo sulia na taa naa a God e iilia ana Jesus Christ na Lord gia na e oolifai gia hai gia ka kwaimaani fai nia a God.

*Adam fai nia a Christ.*

<sup>12</sup> Na aade ta'alaa e dao mai laona molaagali sulia eetana wane nia e aadea doo ta'a. Ma na maea e dao mai laugo fai nia na aade ta'alaa. Ma sulia nia e urinae, na maea ka dao mai fuana

tooa gi sui, sulia na tooa gi sui da aade ta'a. <sup>13</sup> Haia, na aade ta'ala a e too naa la molaagali suifetei a God ka falea na kwaieresia gi fuana a Moses. Haia, si kada e langi ua ta kwaieresia, a God kasi iidumia na doo ta'a gi. <sup>14</sup> Boro i ana ka urinae, e ita mai ana si kada a Adam lea ka dao ana si kada a Moses, tooa gi sui da mae, boro i ana na tooa gi na langi dasi iilia na ta'ala a iilingia a Adam ana si kada nia e oolisuusuu ana a God.

A Adam e iilingia na mamalafooa ana a Christ, baa tara ka dao mai i buri. <sup>15</sup> Haia, na roo wane nae gi langi daaro si bobola, sulia na falelaa o'oni nia a God e langi si iilingia na aade ta'ala a nia a Adam. Sulia na tooa oro da mae i nunufana na aade ta'ala a nia tee wane nae. Haia, ma na rakedianalaa nia a God e baita ka liufia na ta'ala a nia a Adam, ma na falelaa o'oni nia a God e baita ka tasa laugo fuana na tooa oro gi i nunufana na rakedianalaa a Jesus Christ. <sup>16</sup> Ma tee si e'etelaa na e too i matanga na falelaa a God ma na ta'ala a Adam e iilia. Sulia i buira na ta'ala a nia a Adam, a God ka falea kwakwaelaa. Ma buria na doo ta'ala a oro gi lau, a God ka fale o'oni ana o'ololaa fuaga. <sup>17</sup> Haia, sulia na aade ta'alana tee wane, na tooa gi sui daka mae. Ma si doo diana na e dao mai sulia si taa naa a Jesus Christ e iilia, e baita ka tasa. Sulia ni tei gera na da ngalia si rakedianalaa a God fai nia na falelaa nia ana o'oloo, daka too ana mouria firi i langi i nunufana a Christ.

<sup>18</sup> Nia naa, si ta'ala a nia tee wane nia ka falea maea fuana tooa gi sui, ma e urinae laugo na aade dianalaa nia tee wane nia ka olosia tooa gi sui ma ka falea na mouria fuada. <sup>19</sup> Ma tooa

gi sui gera ka haitamana aade ta'alaa, sulia na oolisusuulaa nia tee wane. Ma e urinae, a God ka olosida, sulia na roosulilaa nia tee wane.

<sup>20</sup> A God e falea na kwaieresia gi eeri na aade ta'alaa gi ka oro. Haia, si kada na aade ta'alaa e oro, a God kafi faatainia na rakedianalaa nia ka baita tasa. <sup>21</sup> Nia naa, i nao ua na mai, na aade ta'alaa ka baita faafia na tooa gi haia gera ka mae, ma e urinae ana si kada naa na rakedianalaa a God ka baita faafia na tooa gi haia gera ka o'olo, ma nia na aadea gia ka ngalia na mouria firi sulia a Jesus Christ a Lord gia.

*Gia iilingia mae sui naa fuana ta'alaa.*

## 6

<sup>1</sup> Taa naa tara golu ka haea sulia na baelaa naa gi ku kededa? Gia tasa dongaa na aga uria iili ta'alaa eeri a God ka tasa dongaa ana faatailana na rakedianalaa nia fuaga si kada nia manata lukea ana aade ta'alaa gia gi? <sup>2</sup> Langi! Sulia gia iilingia gia mae sui naa fuana ta'alaa. E afetai gia ka dooria tasa dongaa ana iili ta'alaa. <sup>3</sup> Sulia gamu mu haitamana sui naa si doo naa: si kada gia siuabu ana uria na faatailana na oofuofua fai nia a Jesus Christ, gia ka oofu laugo fai nia ana maelana. <sup>4</sup> Ma ana na siuabulaga, gia ka mae fai nia a Christ, ma da aalu gia laugo fai nia, eeri gia ka too ana mouria faalu, iilingia a Christ na a God na Maa e tataea faasia na maea ana mamanaa ana initoo nia.

<sup>5</sup> Sulia lea gia ka oofu fai nia a Christ ana maelana, tara a God ka tatae gia iilingia nia e tataea a Christ. <sup>6</sup> Ma gia haitamana naa, na

mouria gia baa i nao e mae naa fai nia a Christ i fafona na airarafolo, eeri na maluta kwali gia gi na e ta'a ka funu, eeri na ta'alaa ka langi si initoo faafi gia. <sup>7</sup> Sulia ana si kada iimola e mae, nia langi kasi too i farana rigitaa ana ta'alaa. <sup>8</sup> Ma sulia gia mae fai nia a Christ, gia manata mamana tara gia ka mouria laugo fai nia. <sup>9</sup> Sulia gia haitamana a Christ e tatae faasia na maea, ma e afetai hasa nia ka mae lau, ma na maea ka langi si baita faafia. <sup>10</sup> Ma sulia a Christ e mae, na ta'alaa ka langi si bobola uria iililana tee doo fuana. Ma si kada naa, a Christ e mouria naa fai nia a God. <sup>11</sup> Ma urinae laugo, muka manata uri gamu i talagamu iilingia mu mae fuana aade ta'alaa, ma mu mouri fai nia a God sulia a Jesus Christ.

<sup>12</sup> Nia naa, langi musu lugasia na aade ta'alaa ka baita usia na noni gamu ma langi musu lea sulia na kwaidooria ta'a gi. <sup>13</sup> Ma langi musu faalamainia ta gula ana noni gamu gi fuana ta'alaa, ma langi ka roosulia na manatalaa ta'a gi. Ma lau ana, mu fale gamu i talagamu fuana God iilingia na tooa na a God e tataeda faasia na maea, ma muka lugasia na noni gamu gi ma na mourilaa gamu gi teefou fuana a God haia nia ka iilia na doo o'olo gi ana. <sup>14</sup> Nia naa, langi musu lugasia na aade ta'alaa ka baita ani gamu, sulia gamu langi musu too i farana na kwaieresia gi, ma mu too i farana na rakedianalaa nia a God.

*Tooa da rao fuana o'oloa.*

<sup>15</sup> Utaa? Tara golu ka aade ta'a, sulia golu si too i farana na kwaieresia gi, ma golu too go agolu

i farana na rakedianalaa a God? Langi! <sup>16</sup> Haia, ma ni gamu mu haitamana sui na ana lea mu fale gamu fuana ta iimola uria raolaa fuana, muka roosulia, sulia gamu na iimola raa nia gi. Ma lea so muka fale gamu fuana aade ta'alaa, tara gamu ka mae. Ma lea so muka fale gamu fuana roosulilana a God, nia tara ka olosi gamu. <sup>17</sup> Gia ka baelafea God! Sulia boro ana si kada nao na mu rao fuana aade ta'alaa, ana si kada nae mu roosulia teefou na ana faatolomaia na e mamana mu rongoa. <sup>18</sup> Nia naa, a God e luke gamu faasia na aade ta'alaa ma muka hau na ana iimola raa a God gi eeri muka iilia na o'oloo. <sup>19</sup> (Nau ku bae urinae sulia na doo naa gi, sulia e afetai molu ka haitamana.) Ana si kada e sui na mai, mu fale gamu teefou fuana aade ta'alaa eeri muka iilia na manatalaa ta'a gi. Ma si kada nae, muka fale gamu teefou naa fuana a God eeri muka iilia na o'oloo.

<sup>20</sup> Si kada mu too farana na aade ta'alaa, langi musi dooria iililana o'oloo. <sup>21</sup> Haia, ma na taa diana gi na mu ngalia faasia na aade ta'alaa baa gi mu fai buri ada? Na tooa na da iili ta'a urinae, gera mae. Ma si kada nae, gamu ida sulia na aade ta'alaa gi na mu iilida i nao. <sup>22</sup> Ma ana si kada nae, a God e luke gamu faasia na aade ta'alaa, ma muka hau na ana iimola raa a God gi. Ma sulia muka urinae, oilakea fuagamu sulia mu haitamana roolaa sulia na kwaidoorilaa a God, ma muka ngalia naa na mouria firi. <sup>23</sup> Sulia na aade ta'alaa ka falea maea, sui na falelaa na God e fale o'oni ana i nia naa na mouria firi sulia a Jesus Christ a Lord gia.

*Na manatalaa sulia wane aarai fai nia aai na e afe.*

## 7

<sup>1</sup> Oote waihaasi, nau ku haitamana gamu sui go tara muka haitamana taa na tara nau ku haea, sulia gamu sui go mu haitamana na kwaieresia gi. Na iimola na e too i farana kwaieresia gi go ana ana si kada e mouri. <sup>2</sup> E urinae laugo fuana aai na e afe. Sulia si kada na aarai nia e mouri ua, na kwaieresia e haea na aai na e langi si bobola uria na afelaa lau ana ta wane ete. Sui lea na aarai nia ka mae, nia kafi too oni ma ka bobola uria na afelaa lau. <sup>3</sup> Haia, ma lea na aai na ka too fai nia ta wane ete ana si kada aarai nia e mouri ua ana, na aai nae tara gera ka alangia ana aai ooeoe. Ma lea na aarai nia naa ka mae, i nia ka too oni naa, ma langi dasi alangia ana aai e ooeoe lea so nia ka afe lau ana ta wane. <sup>4</sup> Haia, oote waihaasi nau, nia e urinae laugo ani gamu. Sulia si kada a Christ e mae, iilingia gia laugo gia ka mae. I aena naa na gia ka langi si too i farana na kwaieresia gi faasia a Moses. Haia, ana si kada nae, gia na toa a Christ na a God e tataeda faasia na maea, eeri gia ka bobola uria raolaa fuana a God. <sup>5</sup> Sulia ana si kada gia ka roosulia ua na kwaidoorilaa ta'a gia gi, gia ka dooria asianaa uria iililana na doo gi na kwaieresia gi haeda da aabu. Ma sulia gia aadea na doo ta'a gi urinae, gia bobola uria na maea. <sup>6</sup> Haia, ana si kada nae, langi gia si too naa i farana na kwaieresia gi na e kani gia i nao na mai, sulia na mouria gia i nao da mae naa. Haia, ma ana si kada nae, gia ka rao

fuana a God ma gia ka lea sulia na tala faalu ana na kwaidooria na Aanoedoo Aabu, ma langi gia si lea naa sulia na tala kwali ana na kwaieresia gi na a Moses e kedea.

*Na kwaieresia gi fai nia ta'alaa gi.*

<sup>7</sup> Utaa, na gia ka haea na kwaieresia gi e ta'a? Langi! Na kwaieresia gi e langi kasi ta'a, sulia na kwaieresia gi na e aadea kuka haitamana taa na ta'alaa. Lea so na kwaieresia langi si haea, <<Langi osi dooria doo ta iimola,>> tara nau ku lafusia go agu na gwounge kwaidoorilaa urinae e ta'a. <sup>8</sup> Ma si kada nau ku haitamana kwaidoorilaa urinae e ta'a, nau kuka iili urinae ka baita asianaa uria kwaidoorilaa ana doo na tooa ete gi. Lea so e langi go ta kwaieresia, na kwaidooria uria aadelaa ta'alaa langi kasi rigita. <sup>9</sup> Ana toolagu ua mai si kada kuka lafusia ua na kwaieresia gi, langi kusi dooria go iili ta'alaa. Sui ana si kada nau ku haitamana na kwaieresia gi, nau ku dooria asianaa aadelana doo ta'a gi, <sup>10</sup> ma kufi bobola uria maelaa. Na kwaieresia gi na a God e falea uria faamourilana na tooa, nia ka falea maea fuagu. <sup>11</sup> Sulia na ta'alaa e suge nau ana kwaieresia gi ma ka haungi nau.

<sup>12</sup> Haia, na kwaieresia faasia a Moses gi e aabu ma ka o'olo ma ka diana asianaa. <sup>13</sup> Nia urinae na kwaieresia diana gi na e aadea nau ku mae? Langi! Na aade ta'alaa naa e aadea nau ku mae. E illia ana kwaieresia diana gi. Haia, ma urinae gia ka haitamana na aade ta'alaa gi e ta'a teefou.

<sup>14</sup> Gia gi haitamana na kwaieresia gi e lea mai faasia na Aanoedoo a God. Haia ma nau, nau na wane go ana, ma iilingia nau na wane rao o'oni

fuana ta'alaa. <sup>15</sup> E langi kusi haitamana taa na nau ku iilia, sulia nau langi kusi iilia taa naa nau ku dooria uria kuka iilia, ma kuka iilia agu taa na nau ku oote nau ana. <sup>16</sup> Ma sulia nau ku iilia agu doo na langi kusi doori iilia, nia ka faatainia nau ku aalafaafia na kwaieresia na e diana. <sup>17</sup> Haia, i aena naa langi lau ni nau na ku iilia si doo ta'agi, ma na ta'alaa ana na e too ani nau. <sup>18</sup> Nau ku haitamana na dianalaa langi si too ani nau i laona nonigu. Sulia langi kasi waluda fuagu uria iililana doo diana gi, sui boro i ana kuka dooria iililana doo diana gi. <sup>19</sup> Ma nau langi kusi iilia na doo diana gi na nau ku doori iilia, ma kuka iilia agu na ta'alaa na nau langi kusi doori iilia. <sup>20</sup> Ma lea ku iilia na doo na nau langi kusi doori iilia, tama nau langi na ku iilia. Ma lau ana, na ta'alaa na e too i lalo ani nau ana naa e iilia.

<sup>21</sup> Haia, nau ku daotoona naa nae: si kada nau ku dooria iililana na doo na e diana, na ta'alaa i nonigu ka lui nau. <sup>22</sup> Na mourilagu e dooria asianaa iililana kwaieresia a God gi. <sup>23</sup> Sui na ta'alaa i nonigu ka firu suusia na dianalaa na lao mourilagu. Ma na ta'alaa na e rao la nonigu e suungai nau uria iililana doo ta'agi. <sup>24</sup> Kwaimanatai fuagu nau na wane urii! Tei naa tara ka adomi nau hai kusi roosulia na doorilaa ana noni na e ngali nau uria na maea? <sup>25</sup> Nau ku baelafea God, sulia nia ana naa e adomi nau ana Jesus Christ a Lord gia!

Haia, ana manatagu sui nau na wane raoa God, sui boro i ana na nonigu ka rao fuana ta'alaa.

*Na malutaa faasia na Aanoedoo Aabu.*



## 8

<sup>1</sup> Haia, na tooa gi na da too oofu naa fai nia a Jesus Christ, a God kasi falea na kwakwaelaa naa fuada. <sup>2</sup> Sulia na Aanoedoo Aabu e falea na mouria faalu fuaga sulia a Jesus Christ, ma ka luke gia faasia na aade ta'alaa gi na haitamana ka haungi gia. <sup>3</sup> Na kwaieresia gi faasia a Moses, e afetai ka luke gia faasia na ta'alaa fai nia maea, sulia gia si bobola uria roolaa sulia. Haia, ma a God, nia ana naa e luke gia faasia ta'alaa fai nia maea. Sulia nia e falea na Wela nia eeri ka too ana noni iilingia na iimola gi na da aade ta'a, ma a God ka kwaisuusi ana eeri ka lafua na ta'alaa gi. Urinae a God ka ketoa na aade ta'alaa gia gi. <sup>4</sup> God ka iilia si doo naa haia gia ka bobola uria lealaa sulia na doo o'olo gi na kwaieresia gi e oodu gia uria. Ma waluda go ana sulia gia roosulia na Aanoedoo Aabu, ma na kwaidooria ta'a ana noni ka langi. <sup>5</sup> Ni tei gera na da lea sulia na kwaidoorilaa ana noni, haitamana daka manata go ada sulia na kwaidoorilana noni. Haia, ma ni tei gera na Aanoedoo Aabu e talaida, gera haitamana manatalaa go ada sulia na kwaidoorilaa Aanoedoo Aabu. <sup>6</sup> Ma lea na kwaidoorilaa ana noni e talaia ta iimola, tara nia ka mae. Ma lea na Aanoedoo Aabu e talaia ta iimola, tara nia ka ngalia mouria faalu fai nia na fanualama. <sup>7</sup> Haia, ma lea na kwaidoorilaa ana noni e talaia ta iimola, nia ka maalimaea fai nia a God, sulia nia langi si roosulia na kwaieresia a God gi, ma ka langi si bobola uria roolaa sulia. <sup>8</sup> Na tooa gi na da roosulia na kwaidooria ana noni, e afetai gera ka faaelea a God.

<sup>9</sup> Haia, ma ni gamu, langi musi roosulia na

kwaidoorilaa ana noni. Sulia lea na Aanoedoo Aabu e too la mourilaa gamu, gamu mu roosulia na doorilaa nia. Haia, ma ni tei gera naa na Aanoedoo a Christ e langi kasi too la mourilana, e langi si tooa a Christ. <sup>10</sup> Ma lea a Christ e too la mourilaa gamu, sui boroi ana na noni gamu tara ka mae sulia na aade ta'ala gi, na Aanoedoo Aabu ka falea mouria firi fuagamu, sulia a God e olosi gamu naa. <sup>11</sup> Haia, na Aanoedoo a God na e tataea Jesus Christ faasia na maea, lea nia e too la mourilaa gamu, haia tara a God ka tatae gamu laugo, sulia na Aanoedoo Aabu na e too ani gamu.

<sup>12</sup> Nia nae oote waihaasi gi ae, e langi si diana golu ka roosulia na kwaidooria ta'a gi ana noniga, sulia e diana fuana gia ka roosulia taa na a God e dooria. <sup>13</sup> Sulia lea gamu roosulia na kwaidooria ana noni, tara gamu ka mae. Ma lea gamu ka roosulia na Aanoedoo Aabu eeri muka lugasia na aabulolaa ta'a, tara muka too ana mouria firi. <sup>14</sup> Ma tei gera na Aanoedoo a God e talaida, gera naa na wela a God gi. <sup>15</sup> Sulia na Aanoedoo Aabu na a God e falea fuagamu, nia langi kasi aadea gamu ka aalua iimola gi da rao o'oni ma daka mou asianaa ana God. Ma lau ana, na Aanoedoo Aabu ka aadea gamu ka aalua wela a God gi. Ma sulia na mamanaa ana Aanoedoo Aabu, nia ka faawaluda fuaga hai gia ka alangia God ana <<Maa gia>>. <sup>16</sup> Haia, na Aanoedoo a God, fai nia na mangoga laugo, ka haea gia na wela a God gi. <sup>17</sup> Ma sulia gia na wela nia gi, tara gia ka ngalia na doo diana gi na nia e taingainia fuana na tooa nia gi. Langi lau na doo nae gi

go ana, ma na doo gi na tara nia ka falea fuana Christ, tara nia ka falea laugo fuaga. Sulia lea gia ado fai nia a Christ ana nonifilaa nia, tara gia ka ado laugo fai nia ana initooa nia.

*Na initooa na tara ka dao mai.*

<sup>18</sup> Sui boro'i ana gia ka too ana na nonifilaa gi la molaagali naa, nau ku manata na initooa na tara a God ka falea fuaga, nia naa e baita ka tasa liufia na afetailaa na gia ka liu ana si kada nae. <sup>19</sup> Na doo gi sui go na a God e haungaida, da kwaimaasi sui go maasia si kada a God tara ka faatainia na wela nia gi, ma gera ka dooria si kada nae ka dao ali'ali. <sup>20</sup> Sulia na doo gi sui na God e haungaida, nia falea na kwakwaelaa fuada, haia gera na doo tatagwai gi go ada. A God e iili urinae langi lau sulia na kwaidooria na doo nae gi, ma sulia kwaidooria a God go ana. Sui taa, a God ka kwaimaasimaasia <sup>21</sup> si kada nia ka lukeda faasia na furalaa haia daka initoo fai nia na wela a God gi. <sup>22</sup> Sulia gia haitamana ita ua na mai lea ka dao ana si kada nae, na doo gi sui go da iilingia too ana filaa iilingia na filaa ana si kada aai e aade aagau uria na faafutalaa. <sup>23</sup> Ma ni gia laugo, na gia ka too ana Aanoedoo Aabu na a God e falea fuaga eeri ka faatainia hasa tara nia ka falea na doo oro fuaga, gia ka nonifi si kada gia ka kwaimaasimaasia si kada a God tara ka aalu gia na wela nia gi ma ka luke gia faasia na molaagali naa. <sup>24</sup> Haia, ma a God e faamouri gia sulia na fiitoolaa gia. Ma lea so gia ka rikia na taa gi na gia fiitoo ana, tama e langi go ta fiitoolaa mamana nae. Sulia e langi

ta iimola hasa tara ka fiitoo go ana ana si doo na nia e rikia naa. <sup>25</sup> Ma lea gia kwaimaasimaasia si doo na e langi gia si rikia, gia ka kwaimaasi fai nia na gwaromaabelaa.

<sup>26</sup> Ma urinae laugo na Aanoedoo Aabu e lea mai laugo uria na adomilaga, sulia na fiimanalaa gia e langi kasi rigita. Sulia gia lalafusia tara gia ka fooma utaa fuana a God. Ma na Aanoedoo Aabu ana i talana naa e gania God uri gia la kwailaa na langi gia si bobola uria haelana ana taa baelaa. <sup>27</sup> Ma a God na e haitamana na mourilaga teefou, nia ka haitamana na manatana na Aanoedoo Aabu, sulia na Aanoedoo Aabu ka gania a God oolisi gia na tooa nia gi, sulia na kwaidooria nia a God.

<sup>28</sup> Haia, ma ni gia tooa na gia rakediana fuana a God ma nia ka soe gia sulia na kwaidooria nia, gia gi haitamana ana na doo gi sui na e fuli fuaga, a God e faadiana gia ana. <sup>29</sup> Sulia e tau na mai, a God e aadafili gia ma ka aalu gia eeri gia ka iilingia Jesus na Wela nia, eeri a Jesus ka aalua uulunao fuaga na haasina gi. <sup>30</sup> Haia, ma fuaga na tooa gi na a God e aadafili gia fuana wela nia gi, nia soe gia eeri gia ka manata mamana ani nia. Ma gia na nia soe gia urinae, nia ka olosi gia laugo. Ma gia na nia olosi gia, nia ka falea initoa laugo fuaga.

### *Na rakedianalaa a God.*

<sup>31</sup> Ma ana si kada gia manata sulia doo naa gi, gia ka haitamana e langi tesi doo so ka bobola naa fai nia toelaga, sulia a God e adomi gia.

<sup>32</sup> Sulia na Wela nia a Jesus boro, langi kasi oogani lau ana, ma nia fale nia uria kwaisuusilaa

fuaga. Haia, ma lea na aade dianalaa nia fuaga e urinae, tara nia ka falea laugo na doo gi sui fuaga. <sup>33</sup> Langi ta iimola hai so ka feengia tooa na a God e aadafilida, sulia a God i talana e haea gia langi ta aade ta'alaa ani gia. <sup>34</sup> Ma e langi laugo ta iimola hai so ka keto gia, sulia a Jesus Christ e adomi gia ana baelaa nia fuana a God. A Jesus ka mae ma nia ka tatae laugo, ma ana si kada nae, nia ka gwouru i bali aaolo ana God, ma nia ka ii ani nia uria manata lukelaga. <sup>35</sup> Ma sulia e urinae, tama langi ta doo hai so ka tookita gia faasia na rakedianalaa a Christ fuaga. Sui boro ana gia ka too ana afetailaa baita, ma na tooa gi gera ka aade ta'a fuaga, ma gia ka fiolo, ma gia ka siofaa, ma gera ka haungi gia, e afetai gera ka tookita gia faasia na rakedianalaa nia a Christ fuaga. <sup>36</sup> Sulia na Kekedelaa Aabu baa nia haea, <<Ana si kada gi sui, gera iiliili uria haumaeli gami, sulia mi lea suli oe. I gami mi iilingia na sipsip na da aade aagau ana uria haungilana.>> <sup>37</sup> Sui boro ana gia ka too la afetailaa baita urinae, gia ka haitamana tara gia ka tasa, sulia Christ na e rakediana fuaga. <sup>38</sup> Sulia nau ku haitamana langi ta doo so ka bobola uria tookitalaga faasia na rakedianalaa baita nia fuaga. Sui boro ana si kada gia mouri ua ana, langi so gia ka mae, gia ka ngalia na rakedianalaa nia. Langi ta ensel so ta doo i langi ka lafua na rakedianalaa a Christ faasi gia. Ma e afetai laugo fuana tesi doo ana si kada nae langi ana si kada e nii ua mai so ka tookita gia faasia na rakedianalaa nia fuaga. <sup>39</sup> Langi laugo ta doo la

molaagali ma langi i langi, ma langi ta doo ana doo gi na a God e haungainida ka bobola uria lafulana na rakedianalaa nia. E afetai gera ka tookita gia faasia na rakedianalaa a God na e too ana fuaga ma ka faatainia fuaga ana Jesus Christ na Lord gia.

*Sulia na tooa i Jiu gi.*

## 9

<sup>1</sup> Haia, tesi doo na nau ku dooria haea fuagamu, ma si doo nae nia mamana asianaa. I nau kusi haitamana sugelaa, sulia nau na wane fafurongo a Christ. Ma nau ku haitamana na baelaa na tara kuka haea fuagamu, nia mamana, sulia na Aanoedoo Aabu naa e talaia na manatalaa nau. <sup>2</sup> Si doo na nau ku haea nia urii, nau ku liobukonu asianaa ana si kada gi sui, sulia na tooa i Jiu gi na langi dasi manata mamana ana a Christ. <sup>3</sup> I gera naa na tooa nau gi, sulia nau laugo ta wane i Jiu. Nau ku dooria agu lea so ka waluda, na oofulaa nau fai nia a Christ ka lafu ana ma nau kuka ngalia agu na kwakwaelaa oolisi gera. <sup>4</sup> Sulia na Jiu gi, gera na tooa a God gi. A God e suluida ua na mai eeri gera ka iilingia na wela nia gi, ma nia ka faatainia na initooa nia fuada. A God ka bae aalualu fuada hasa tara ka faadiana gera. Ma a God ka falea na kwaieresia gi fuada. Ma gera ka haitamana fooasi mamananalaa ana a God. Ma a God ka falea teni bae aalualua diana gi laugo fuada. <sup>5</sup> Ma na kwalafaa gera naa na wane baita na a God e aadafilida ua na mai. Ma a Christ laugo, ana si kada nia e futa mai eeri ka hau ana wane, nia

naa ta wane i Jiu. Nia diana fuana tooa gi sui daka baelafea a God tofungana mamana too ka tau! Amen.

<sup>6</sup> Haia, nau langi kusi haea God langi si faamamana bae aalualua nia, sulia langi lau na tooa i Jiu gi sui go na tooa a God gi. <sup>7</sup> Ma langi hasa kwalafaa a Abraham sui go na wela a God gi. Sulia a God e bae urii fuana Abraham, <<Tara ana Aesak oko fi too ana kwalafaa baa ku bae aalualu ana fuamu.>> <sup>8</sup> Ma si doo naa e faatolomai gia ana langi lau na kwalafaa a Abraham gi sui naa na wela a God gi. Sulia na tooa gi na da futa mai sulia na bae aalualua a God fuana Abraham, gera naa na kwalafaa Abraham gi mamana. <sup>9</sup> Sulia a God e bae aalualu fuana Abraham urii, <<Ana si kada o'olo, nau ku ooli lau mai siamu, ma tara ni Sara ka kwalafia tee wela wane.>>

<sup>10</sup> Ma langi lau si doo naa gi go ana. Sulia ni Rebeka fai nia na aarai nia Aesak na koo gia, daaro too ana roo wela wane gi. <sup>11-12</sup> Ma suifetei ni Rebeka kafi faafutaa na iu nae gi, a God ka bae urii fuana, <<Na wane i nao tara ka aalua wane ni raolaa fuana wane i buri.>> Nia haea si doo naa suifetei na roo iu nae gi daaro kafi futa ma suifetei daaro kafi iilia si taa na e diana langi ka ta'a. Nia e urinae sulia a God e faatolomai gia ana lea nia aadafilia na tooa, langi lau sulia na raolaa gi gera iilida, ma sulia nia e dooria go ana. <sup>13</sup> Sulia na Kekedelaa Aabu baa e haea ka urii, <<Nau ku aadafilia a Jakob, ma kuka oote nau ana Esau.>>

<sup>14</sup> Haia, ma lea ta iimola ka haea taa naa a God e iilia langi kasi o'olo, nia garo asianaa.

<sup>15</sup> Sulia God e hae ua na mai fuana a Moses urii, <<I nau ana na ku aadafilida tei naa tara kuka kwaimanatai ana. Ma nau ku aadafilida sulia na kwaidoorilaa nau go ana.>> <sup>16</sup> Sulia na doo nae gi, gia ka haitamana a God ka faadianaa tooa langi lau sulia na doo gi gera dooria ma langi da iilida, ma a God ka faadianaa tooa gi sulia kwaimanatailaa nia go ana. <sup>17</sup> Sulia a God kasi kwaimanatai fuana na aaofia i Ejipt, ma ka bae urii fuana la Kekedelaa Aabu, <<Nau ku aalu oe oko aaofia eeri kuka faatainia na mamanaa nau ana si doo gi na tara kuka iilida fuamu, ma eeri na tooa gi ana fera gi sui daka haitamana na babaitaa nau.>> <sup>18</sup> Nia naa, God e haitamana ka kwaimanatai go ana fuana ni tei naa nia e dooria, ma nia ka faangasia manatana ni tei naa nia e dooria.

*Rakehasua ma na kwaimanataia God.*

<sup>19</sup> Haia, ta iimola oto tara ka bae urii, <<Utaa naa God ka rakehasuia tooa gi sulia da aade ta'a, sulia e afetai fuada gera ka take usia na kwaidooria God?>> <sup>20</sup> Haia, ma nau ku oolisia urii: golu na tooa na a God e haungai golu, golu kasi bobola go agolu uria oolislana a God urinae! Haia, golu iilingia na kuki na ta wane e haungai nia ana boboi gano. Na doo nae kasi bobola uria ledilana na wane na e haungai nia urii, <<Uria taa na oko haungai nau urii?>> <sup>21</sup> Ma na wane na e haungai nia na roo kuki gi ana boboi gano, nia ka too ana mamanaa uria iililaa sulia kwaidooria nia. Nia ka haitamana ka laungia ta doo hai ka aada diana, ma ta doo hai ka langi, eeri ta doo



fuana maedani baita, ma ta doo hai fuana kada gi sui go ana.

<sup>22</sup> Ma nia urinae laugo fuana si taa naa God e iilia. Sulia ana si kada nia e dooria ka faatainia na rakehasua nia ma na mamanaa nia, nia ka gwaromaabe ma ka langi kesi ali'ali uria faatailana na rakehasua nia fuana na tooa gi na tara nia ka ketoda. <sup>23</sup> Ma nia ka dooria laugo fuana ka faatai nia na initooa baita nia, na nia ka falea fuaga na tooa na nia kwaimanatai fuaga. Sulia a God ka aade aagau ani gia uria initooa laugo fai nia. <sup>24</sup> Sulia gia naa na tooa nia soe gia, langi lau faasia na Jiu gi go ana, ma faasia na tooa maadiu gi laugo. <sup>25</sup> Haia, ma a God e bae urii i laona bali ana Kekedelaa Aabu na a Hosea e kedea, <<Na tooa na langi lau na tooa nau, nau tara kuka alangida ana tooa nau. Ma na tooa gi na langi kusi rakediana fuada, nau tara kuka alangida ana tooa rakediana nau. <sup>26</sup> Ma ana si gula na nau ku haea, <Gamu langi lau na tooa nau,> seenae tara daka alangida ana wela a God momouri gi.>>

<sup>27</sup> Ma Aesea ka bae sulia na tooa i Jiu gi urii, <<Sui boroi ana tooa i Israel gera ka oro mala migena oone fakana aasi, tara tee aange iimola gi go ada na a God ka faamouri gera. <sup>28</sup> Sulia ali'ali a Lord tara ka ketoa na tooa gi sui la molaagali.>> <sup>29</sup> Sulia a Aesea e haea na mai nao laugo urii, <<Lea so a Lord tofungana mamana langi kasi faamouria teni kwalafaa gi fuaga, tara langi ta iimola Jiu so ka mouri, iilingia na tooa gi sui i Sodom ma Gomora na gera mae naa.>>

*Na tooa i Jiu gi na dasi fiiamana.*

<sup>30</sup> Haia, sulia na doo nae gi, gia haitamana na tooa maadiu gi, na langi dasi iili uria na olosilada i talada, a God ka olosida sulia na fiiமானalaa gera. <sup>31</sup> Sui, na tooa i Jiu gi na da iili uria na olosilada i talada ana roosulilana na kwaieresia gi, langi dasi bobola uria iililana. <sup>32</sup> Ma langi gera si bobola uria iililana, sulia gera fiitoo ada ana na raolaa diana gera gi, ma langi dasi fiitoo ana manata mamanalaa. Ma sulia e urinae gera garo iilingia na tooa da tafai gera ana ta fou ni tafailaa. <sup>33</sup> Sulia na Kekedelaa Aabu e bae sulia urii, <<Aada, nau tara ku aalua tee fou la fera Sion. Ma na tooa gi tara gera ka tafai gera ana, ma gera ka asi gera. Haia, ma na tooa gi na da fiiமானana ana, langi dasi liobukonu sulia na fiiமானalaa gera.>>

## 10

<sup>1</sup> Oote waihaasi gi, nau ku dooria asianaa na tooa nau gi Jiu daka ngalia na mouria firi. Si doo naa nau ku fooa uria fuana God sulia dani. <sup>2</sup> Nau ku haitamana gera rigita asianaa uria fooasilana a God. Sui, na fooalaa gera gi e garo, sulia gera si haitamana na faatolomailaa mamana. <sup>3</sup> Sulia gera lafusia na malutana a God uria olosilana na tooa. Ma gera ka iili uria olosi geralaa i talada ana malutaa na gera haungainia. Urinae gera ka oote gera ana malutana a God uria olosilana tooa. <sup>4</sup> Sulia a Christ e faasuia naa na kwaieresia gi faasia a Moses, hai tei gera na da manata mamana naa daka o'olo naa i maana a God.

<sup>5</sup> Haia, a Moses e kekede sulia na o'olo ana roolaa sulia na kwaieresia gi urii, <<So ni tei naa

e roosulia na kwaieresia gi tara nia ka mouri.>>  
6 Haia, na Kekedelaa Aabu e bae sulia na o'oloo ana fiiamanalaa ka urii, <<Langi osi soeledi oe i talamu, <Tei naa tara ka raa i langi?>>> eeri ka faasifoa mai a Christ i aano, sulia a Christ e sifo sui na mai. 7 <<Ma langi oko soeledi urii, <Tei naa tara ka sifo la gula ni maea?>>> eeri ka taea mai Christ, sulia a Christ e tatae sui naa. 8 Ma na Kekedelaa Aabu ka haea laugo urii, <<Na faarongolaa God e nii garangi oe naa, e nii laona baelamu ma i laona mourilamu.>> Na faarongolaa nae, nia na faarongolaa sulia na fiiamanalaa na mi ainitalongainia. 9 Lea mu haea ana Jesus nia a Lord, ma muka manata mamana ana a God e taea faasia na maea, tara muka mouri. 10 Sulia a God e olosi gia sulia na fiiamanalaa gia ana Jesus. Ma nia ka faamouri gia sulia na baelaa gia sulia na fiiamanalaa gia. 11 Sulia na Kekedelaa Aabu e haea urii, <<So ni tei naa e manata mamana ani nia, tara nia ka langi si liobukonu sulia na fiiamanalaa nia.>> 12 Ma na Kekedelaa Aabu nae, nia sulia na tooa gi sui, na tooa i Jiu gi ma tooa maadiu gi. Sulia a Lord langi kasi eefa ta iimola. A God, nia na Lord fuana tooa gi sui, ma nia ka faadianaa na tooa gi sui na da gani nia uria ta kwai'adomilaa. 13 Sulia na Kekedelaa Aabu e haea, <<Tara a Lord ka faamouria ni tei gera sui go na da soe fuana uria kwai'adomilaa.>> 14 Haia, ma tara gera ka soe fuana a God uria kwai'adomilaa utaa, lea langi dasi manata mamana ani nia? Ma tara daka manata mamana utaa, lea langi dasi rongoa ua na faarongolaa? Ma tara gera ka rongoa utaa, lea langi ta iimola

haia ka ainalongainia? <sup>15</sup> Ma tara na tooa gi daka ainalongainia na faarongolaa utaa, lea langi ta iimola hai ka oodua teni tooa uria ainalongailana? Nia iilingia na Kekedelaa Aabu e haea, <<Lea teni tooa da dao mai fai nia na Faarongolaa Diana, nia diana asianaa!>> <sup>16</sup> Haia, ma langi lau na tooa gi sui da manata mamana ana na Faarongolaa Diana. Sulia Aesea e bae urii, <<Lord, langi lau na tooa gi sui da manata mamana ana faarongolaa gami.>> <sup>17</sup> Haia, na tooa gi haitamana daka manata mamana lea gera rongoa na Faarongolaa Diana. Ma na Faarongolaa Diana ka lea mai faasia ainalongailana Christ.

<sup>18</sup> Haia, ma ni nau ku ledi, nia mamana na hasa langi dasi rongoa na Faarongolaa Diana? Langi. Gera rongoa, sulia na Kekedelaa Aabu e bae urii, <<Na lingeeda e talofia la molaagali sui. Ma na ainalongailana baelana gi lea ka dao mai laona molaagali teefou.>> <sup>19</sup> Haia, ma nau ku ledi lau ku urii, na tooa i Jiu gi, langi dasi haitamana go na faarongolaa nae? Langi. Gera haitamana, sulia a Moses e kedea na baelaa a God urii, <<Nau tara ku aade gamu tooa Jiu gi hai muka kwaifii sulia na tooa maadiu gi na tara kuka faamouri gera. Ma nau tara ku aade gamu muka rakehasu sulia ku rakediana fuana tooa na langi dasi haitamagu.>> <sup>20</sup> Ma a Aesea e bae rara'a i nao ka urii, <<Na tooa na langi dasi nanisi nau, gera ka daotoogu. Ma na tooa na langi dasi ledi suli nau, nau kuka aadea hai gera ka haitamagu.>> <sup>21</sup> Ma fuana tooa i Jiu gi, a Aesea ka bae urii suli gera, <<Sui boroi ana na

manatada ka ngasi ma gera ka aaburongo, tau na mai nau ku soe gera eeri gera ka lea mai siagu.>>

*Na kwaimanatailaa God fuada Jiu gi.*

## 11

<sup>1</sup> Haia, utaa, a God ka oote nia ana na tooa nia gi? Langi go! I nau boroi i talagu nau na wane Jiu, sulia nau ta wane ana kwalafaa a Abraham ma a Benjamin. <sup>2</sup> God langi kasi oote nia go ana tooa nia gi na nia aadafilida ua na mai ana hahafalilana. Gamu haitamana na baelaa a Elaeja i laona Kekedelaa Aabu si kada nia e fooa fuana a God sulia na tooa Jiu gi e urii, <sup>3</sup> <<Lord, gera haungia na profet oe gi, ma daka tagalangainia na fuliere oe gi. Ma tee taifili nau naa na ku too ua ana raolaa ana profet, ma gera ka hasi uria haumaelilagu.>> <sup>4</sup> Ma a God e oolisia ka urii, <<Nau ku too ana na fiu tooni Jiu gi na langi dasi fooasia a Baal na nunuidoo.>> <sup>5</sup> Ma nia urinae laugo ana si kada nae, sulia tee aange Jiu go na da manata mamana, ma gera naa na tooa na a God e aadafilida sulia na rakedianalaa nia. <sup>6</sup> Ma nia aadafilida sulia na rakedianalaa nia, langi lau sulia na taa gi naa gera iilida. Sulia lea a God e aadafilida na tooa sulia na taa gi naa gera iilida, nia e langi lau sulia na rakedianalaa mamana.

<sup>7</sup> Ma sulia nia urinae, na tooa oro i Jiu gi langi gera si daotoona go taa naa gera nani uria. Taifilia aange iimola ani gera go na God e aadafilida na da daotoona. Ma ta bali aai, gera oote gera ana fafurongolana a God.

<sup>8</sup> Sulia na Kekedelaa Aabu e haea, <<A God e

aadea na manatada ka langi si haitamana taa gi na gera rikia ma taa gi na gera rongoa, lelea tara'ena boroi.>> <sup>9</sup> Haia, ma a David ka bae urii i laona Kekedelaa Aabu, <<Gera dasi mou ana kwakwaelaa a God, sulia God e faadiana gera asianaa. Ma sulia e urinae, nau ku fooma eeri a God ka falea kwakwaelaa fuada. <sup>10</sup> Nau ku fooma eeri na maada ka rodo haia langi dasi aada, ma nau ku fooma eeri gera ka liu ana afetailaa oro sulia dani firi.>>

<sup>11</sup> Haia, na Jiu gi da tafai gera sulia langi dasi manata mamana ana Christ. Haia, langi musi manata go hasa tara a God ka langi si oolifai gera uria fimamanalaa. Sulia na tooa maadiu gi da too ana mouria faalu faasia a God, sulia na aade ta'alaalaa gera Jiu gi. Si doo naa e urinae haia na tooa Jiu gi gera ka kwaifii uria ngalilana na mouria faalu nae. <sup>12</sup> Sulia na aade ta'alaalaa na Jiu gi, doo diana oro gi ka dao mai la molaagali. Ma sulia gera ka oote gera ana Christ, a God ka faadianaa ana tooa maadiu gi. Haia, ana si kada na Jiu oro gi gera manata mamana, tara a God ka faadiana gia ka tasa.

*Na mouria firi fuana tooa maadiu gi.*

<sup>13</sup> Haia, nau tara ku faarai fuagamu nae tooa maadiu gi. Nau na aposol fuagamu, ma nau ku eele asianaa sulia na raoa nau uria ainitalon-gailana na Faarongolaa Diana fuagamu. <sup>14</sup> Na tooa gi na da Jiu iilingi nau, lea nau ku faarai suli gamu, tara gera oto ka kwaifii. Urinae, tara kuka adomida uria ngalilana mouria faalu laugo. <sup>15</sup> Sulia si kada a God e oote nia ani gera, nia ka oolisia ana tooa maadiu gi faasia na maalimaea

nia gi uria na ruana nia gi. Haia, ma ana si kada a God e gonitai gera na Jiu gi lau, tara nia ka faadiana tasa ana tooa nia gi sui, iilingia nia ka tataea na iimola gi faasia na maea.

<sup>16</sup> Ma lea na mani beredi totongenao ana fe beredi da falea fuana God, tama fe beredi nae loulou naa doo nia God laugo. Ma lea na lalina na ai da falea fuana a God, urinae na hare doo gi na doo nia gi laugo. <sup>17</sup> Haia, ma na Jiu gi, gera iilingia ta ai na a God e fasia. Ma teni hare doo ana ai naa, a God e mo'oia. Ma fuagamu tooa maadiu gi, gamu mu iilingia na hare ai kwasi, ma a God e ngalia ma ka faataea ana gula na nia oia ana hare doo gi faasia. Ma ka urinae laugo ana si kada nae, sulia a God e faadiana gamu ka iilingia laugo nia faadiana tooa i Jiu gi ua na mai.

<sup>18</sup> Ma langi musi manata hasa mu baita ka tasa liufia na tooa i Jiu gi na da iilingia na hare doo na a God e oida, sulia gamu na hare doo gi go ana, ma na faabulaolana hare doo gi e lea mai faasia na lalina ai. Haia na bulaolana lalina ai langi si lea mai faasia na hare doo gi.

<sup>19</sup> Haia, nia waluda fuana ta iimola maadiu ka bae urii, <<A God e lafua na Jiu gi eeri gia ka oolisida.>> <sup>20</sup> Nia mamana, gamu naa mu oolisida. Ma na aena naa a God ka lafua tooa Jiu gi sulia langi dasi manata mamana. Ma aena taa naa nia ka aalu gamu oolisida sulia mu manata mamana. Haia, langi si diana fuana gamu ka lafe sulia na doo nae, ma lau ana muka mou, aata a God ka oi gamu laugo. <sup>21</sup> Sulia lea a God e falea kwakwaelaa fuana na tooa i Jiu gi na da iilingia na hare doo mamana gi, tara nia ka falea laugo

na kwakwaelaa fuagamu na mu iilingia na hare doo gi faasia na ai e'ete lea mu oote gamu ani nia. <sup>22</sup> Aena si doo naa, gia ka haitamana na rakediana a God fai nia na kwakwaea nia. Nia e falea na kwakwaelaa fuana tei gera na langi dasi manata mamana ani nia. Ma nia ka rakediana fuagamu lea so muka tasa dongaa uria ngalilana na rakedianalaa nia. Ma lea langi, tara nia ka lafu gamu laugo. <sup>23</sup> Ma lea na tooa i Jiu gi gera ka lugasia na aabu manata mamanalaa gera gi, tara a God ka oolifai gera uria si gula na gera too mai ana. Sulia a God haitamana ka iilia si doo nae. <sup>24</sup> Haia, i gamu tooa maadiu gi, gamu langi lau na hare doo mamana faasia na ai na a God e fasia. Sulia gamu mu lea mai faasia na ai kwasi, ma a God e oi gamu, ma ka aalu gamu ana ai na nia fasia. Ma lea so ka waluda fuana a God ka aalu gamu ana ai nia, nia tara ka waluda asianaa fuana a God ka oolifai gera na Jiu gi uria ai na nia e oi gera mai faasia.

*Kwaimanatailaa God fuana tooa gi sui.*

<sup>25</sup> Haia, oote waihaasi, nau ku dooria muka haitamana taa naa tara ka dao mai, na aange iimola go ana da haitamana. Nau ku tala-matainia fuagamu haia langi musi lafe. Na aabu manata mamanalaa gera Jiu gi e langi kasi too firi. Sulia si kada na tooa maadiu gi sui na a God e aadaflida da manata mamana ani nia, na tooa i Jiu gi laugo daka oolifai manataa. <sup>26</sup> Ma urinae a God tara ka faamouria na tooa i Jiu gi sui. Sulia na Kekedelaa Aabu e haea, <<Na Wane faamouri tara ka lea mai faasia Sion, ma ka lafua na aade ta'alaa gi faasia na kwalafaa a Jakob. <sup>27</sup> Ma nau



tara ku faamamanaa na bae aalualua nau ua naa mai fai gera, sulia nau ku lafua na aade ta'alaa gera gi.>>

<sup>28</sup> Haia, ma na tooa i Jiu gi na da oote gera ana na Faarongolaa Diana, gera naa na maalimaea a God gi. Ma sulia si doo nae naa gamu na tooa maadiu gi muka rongoa na Faarongolaa Diana nae. Sui ka urinae boro ana, a God e rakediana fuagera, sulia nia aadafilida, ma sulia na bae aalualua nia ua na mai fuana koo gera gi. <sup>29</sup> Sulia a God langi kasi oolisia na manatana sulia ni tei gera na nia e aadafilida ma ka faadiana gera. <sup>30</sup> Haia, ma ni gamu tooa maadiu gi, ana si kada sui naa mai, langi musi roosulia God. Sui ana si kada nae, gamu mu ngalia naa na kwaimanatailaa a God, sulia na tooa i Jiu gi langi gera kasi roosulia. <sup>31</sup> Ma urinae laugo, na tooa i Jiu gi da aaburongo ana a God, eeri si kada gamu ngalia ana kwaimanatailaa faasia a God, tara gera ka ngalia laugo. <sup>32</sup> Sulia a God e faalamainia tooa gi sui daka aaburongo ma daka too i farana aaburongolaa gera, haia nia ka kwaimanatai fuada sui.

### *Baelafea a God.*

<sup>33</sup> A God e faadiana gia asianaa! Na liotooa ma na haitamadoolaa nia ka baita asianaa! Langi ta iimola si haitamana na manatalaa a God ma na malutana. <sup>34</sup> Sulia na Kekedelaa Aabu e haea, <<Langi ta iimola haia so ka haitamana na manatalaa nia a Lord, ma langi ta iimola so ka bobola uria adomilana a Lord ana manatalaa nia. <sup>35</sup> Ma langi ta iimola si falea tesi doo fuana a God hai a God ka bobola uria falelana laugo

fuana.>> <sup>36</sup> Sulia a God naa e haungainia na doo gi sui, ma na doo gi sui da too ua na mai sulia nia ma fuana ni nia. Gia ka baelafea a God too ka tau! Amen.

*Raolaa fuana a God.*

## 12

<sup>1</sup> Haia, oote waihaasi nau gi ae, sulia na kwaimanatailaa God fuaga e baita asianaa, nau ku gani gamu, haia muka falea na mourilaa gamu fuana a God iilingia ta kwaisuusia, eeri muka iilia na raolaa aabu na e faaele nia. Sulia nia naa na foosilana mamana. <sup>2</sup> Ma langi musi iili sulia malutaa ta'a la molaagali naa. Ma lau ana, muka lugasia God ka oolisia na mourilaa gamu ana faafaalulana na manata gamu, haia muka haitamana taa naa e diana ma e o'olo ma taa naa e faaelea a God. Sulia na doo nae gi naa a God e dooria.

<sup>3</sup> Ma sulia a God e falea na mamanaa fuagu, nau ku haea fuagamu sui: muka too faasia na manata baitalaa ani gamu i talagamu ka tasa. Ma lau ana, muka faato'ou gamu ana i talagamu, ma muka manata suli gamu i talagamu iilingia na baitalaa ana fiimamanalaa na a God e falea fuagamu. <sup>4</sup> Haia, gia na tooa na gia manata mamana ana a Christ, gia gi iilingia ta noni. Ma na noni nae ka too ana bali doo oro gi, ma na bali doo naa gi na raa gera gi e'ete kwailiu. <sup>5</sup> Sui boroi ana gia na tooa oro gi, gia ka iilingia tesi noni go ana oofuofua gia fai nia a Christ, ma gi lado fai gia kwailiu iilingia bali doo e'ete gi ana tesi noni. <sup>6</sup> Haia, gia too ana haitamadoolaa

e'ete na a God e falea fuaga sulia na rakedianalaa nia. Haia, ma ta iimola ani gia, lea a God e falea fuana haitamadoolaa uria ainalalolaa ana Faarongolaa nia, nia ka iilia ka bobola fai nia na fimamanalaa na nia too ana. <sup>7</sup> Ma ta iimola aai, lea a God ka falea haitamadoolaa fuana uria kwai'adomilaa, nia ka adomi mamana ana na tooa gi. Ma ta iimola aai, lea a God ka falea haitamadoolaa fuana uria faatolomailaa, nia ka faatolomai mamana. <sup>8</sup> Ma ta iimola aai, lea a God ka falea haitamadoolaa fuana uria na aarelana iimola gi, nia ka iilia. Ma tei naa ani gamu na haitamana oko ado fai nia teni tooa lau, oko iilia ka baita. Ma tei ani gamu na o too ana babaitaa, oko rao rigita. Ma ni tei na e iilia diana fuana tooa gi, nia ka iilia fai nia na noni hahalalaa.

<sup>9</sup> Haia, na rakedianalaa na gia too ana fuana tooa gi, nia bobola uria rakedianalaa mamana, ma langi gia si kwailifai. Ma muka oote gamu ana taa naa e ta'a, ma lau ana muka dau ngasi ana taa naa e diana. <sup>10</sup> Muka rakediana tasa fuagamu kwailiu, sulia gamu na bare waihaasina ana a Christ. Ma muka manata baita ani gamu kwailiu. <sup>11</sup> Muka rao rigita, ma langi musi noni eela. Muka rao fuana a Lord fai nia eelelaa. <sup>12</sup> Muka eele sulia na fiitoolaa gamu. Ma muka gwaromaabe si kada mu daotoona afetailaa gi. Ma muka fooma ana si kada gi sui. <sup>13</sup> Ma muka ado ana doo gamu gi fai gera na waihaasi gamu gi ana Christ na da siofaa. Ma muka gonitainia na tooa na da dao, eeri gera ka too i laona na luma gamu gi.

<sup>14</sup> Haia, na tooa gi na da iinokesi gamu, muka fooma eeri a God ka faadiana gera, ma langi musi

gania haia ka falea kwakwaelaa fuada. <sup>15</sup> Muka eele fai nia na tooa gi si kada gera eele, ma muka liobukonu fai nia na tooa gi si kada gera liobukonu. <sup>16</sup> Muka too kwaimaani fai nia tooa gi sui. Langi musi lafe, ma lau ana muka iilia na raoa fuana tooa ete gi. Ma langi musi manata hasa mu liotoo asianaa.

<sup>17</sup> Lea ta iimola e aade ta'a fuagamu, langi musi oolisia ana aade ta'alaa. Muka iiliili uria iililana si taa naa iimola gi sui gera manata sulia nia diana. <sup>18</sup> Muka iilia na doo gi sui na e waluda fuagamu eeri muka too kwaimaani fai nia tooa gi sui. <sup>19</sup> Oote ruana nau gi ae, lea ta iimola e aadea tesi doo ka ta'a fuagamu, lugasia langi musi duua. Sulia a God na ana na wane uria falea kwakwaea. Sulia na Kekedelaa Aabu e haea urii, <<A Lord e haea, <Tara nau ku duua, ma kuka oolisia na doo gi.>> <sup>20</sup> Ma muka roosulia na Kekedelaa Aabu na e haea, <<Lea na maalimaea oe e fiolo, oko hangonia. Ma lea nia maeligwou, oko falea gwoulaa fuana. Sulia lea o iili urinae fuana, tara nia ka ida asianaa sulia si doo ta'a gi na nia aadea fuamu.>> <sup>21</sup> Haia, langi musi lugasia na ta'alaa ka liufi gamu. Gamu ana naa, muka liufia na ta'alaa ana na aade dianalaa gamu gi.

*Roosulia na tooa baita gi.*

## 13

<sup>1</sup> Gamu sui, muka roosulia na tooa baita gi ana fera gamu gi, sulia na babaita gera gi da ita mai faasia a God, ma a God ka faalamai gera uria talailaa gamu. <sup>2</sup> Ma so ni tei naa e iili uria na takelaa suusia na tooa baita naa gi, nia ka take

laugo suusia taa gi na God e haeda. Ma ta iimola na e iili urinae, tara ka ngalia kwakwaelaa. <sup>3</sup> Na tooa gi na da iilia doo diana gi, e langi gera si mou ana tooa baita gi. Na tooa gi na da aade ta'a, gera ana naa daka mou ana tooa baita gi. Haia, lea mu dooria hasa langi musi mou ana tooa baita gi, haia e urinae muka iili diana, ma tara gera ka tango gamu. <sup>4</sup> Sulia gera na iimola raoa a God uria adomilaa gamu. Ma lea gamu mu aade ta'a, muka mou ada, sulia gera too ana mamanaa uria na kwakwaelaa. Sulia gera naa tooa raoa a God uria falelana kwakwaelaa fuana tei naa aadelana e ta'a. <sup>5</sup> Haia, sulia nia urinae, muka roosulia na iimola baita gi ana fera, sulia na kwakwaelaa faasia a God, ma sulia laugo gamu mu haitamana nia naa na aabulolaa nia e o'olo.

<sup>6</sup> I aena si doo nae gi laugo, gamu ka foli takisi gi, sulia na tooa baita gi da rao fuana a God lea gera iili diana ana raolaa gera gi. <sup>7</sup> Muka folia si doo gi sui na kwaieresia gi ana fera gamu nia e haea. Ma muka manata baita ana na tooa baita gi sui.

*Raolaa diana gi muka iilia fuagamu kwailiu.*

<sup>8</sup> Haia, langi musi ngalilanga ana tesi doo ana ta iimola, ma tee si ngalilangalaa na e bobola naa na muka rakediana fuagamu kwailiu. Ma so ni tei naa e rakediana urinae, nia e roosulia naa na kwaieresia a God gi. <sup>9</sup> Sulia na kwaieresia gi e urii, <<Langi osi ooe, langi osi haungia ta iimola, langi osi beli, langi osi dooria doo teni iimola gi.>> Na kwaieresia nae gi fai nia si doo gi sui lau, gera bola fai nia tee kwaieresia go baa e urii, <<Oko rakediana fuana na iimola aefera oe

gi iilingia o iilia fuamu i talamu.>> <sup>10</sup> Sulia lea mu rakediana fuana ta iimola, langi musi haitamana aadea ta'alaa fuana. Nia naa, lea mu rakediana, muka roosulia na kwaieresia gi sui.

<sup>11</sup> Muka iilia si doo naa, sulia mu haitamana naa si kada a Christ, na e faamouri gia, ka dao mai, nia garangi naa liufia ana si kada gia hafali manata mamana ana. Nia naa, muka aade aagau uria na gonitailana a Christ, ma langi musi iilingia na tooa na da teo go ada. <sup>12</sup> Haia, na initoona rodo e sui naa, ma na dani e garangi na mai. Nia naa, gia ka too faasia na aabulolaa ta'a iilingia na tooa gi da iilia ana rodo. Ma lau ana, na raoa diana gia gi ka iilingia na raunga gia gi eeri gia ka firu fai nia a Satan. <sup>13</sup> Nia bobola fuana aabulolaga ka o'olo iilingia na tooa na da too la raralaa ana dani. Langi musi gwou baita uria gwou bubulolaa, langi musi ooe, langi musi firu, ma langi musi kwaifi. <sup>14</sup> Haia, muka iilifainia a Lord Jesus Christ, ma langi musi manata fuana kwaidooria ta'a ana noni gamu.

*Langi musi ketoa waihaasi gamu.*

## 14

<sup>1</sup> Haia, ta iimola na fiimamanalaa nia ana a Christ e langi kasi ngado ua, lea nia ka dao mai siagamu, muka gonitainia, ma langi musi oolisuusuu fai nia sulia na manata nia gi. <sup>2</sup> Haia, teni iimola gi na fiimamanalaa gera e ngado, gera haitamana daka ania go ada fanga e'ete kwailiu gi sui. Haia, ma teni tooa naa na fiimamanalaa gera langi kasi ngado, gera manata

hasa marikona doo kwasi e aabu fuana anilana. <sup>3</sup> Ma na tooa gi na da haitamana daka ania kwalukaela fanga langi daka si manata ta'a sulia na tooa gi na langi dasi ania mariko. Ka urinae laugo, na tooa na langi dasi ania mariko langi dasi ketoa na tooa na haitamana daka ania kwalukaela fanga. Sulia gera na tooa a God e aalafaafi gera. <sup>4</sup> E langi si bobola fuana gia ka ketoa na tooa ni raoa ta iimola ete. Sulia a God naa na wane baita gera, nia naa ana na tara ka keto gera uria falelana kwaiareia ma langi kwakwaelaa. Ma gera tara daka iili diana, sulia a Lord e bobola uria adomilada eeri daka iili diana.

<sup>5</sup> Haia, ma nia urinae laugo, teni iimola haea tee fe dani e baita ka tasa liufia fe dani ete gi. Ma teni tooa daka haea fe dani gi sui e bobola go ada. Haia, ma nia diana fuana gera sui daka roosulia na taa naa gera manata sulia nia o'olo. <sup>6</sup> Ma na iimola na e manata baita ana tee fe dani, nia ka iilia uria na hae initoolaa ana Lord. Ma na iimola na e haitamana ka ania tesi fanga, nia iilia uria hae initoolaa ana a Lord, sulia nia ka baelafea a God fuana fanga nae. Ma ni tei naa e oote nia anilana ta gwounge fanga e iilia uria hae initoolaa ana Lord, ma nia ka baelafea God. <sup>7</sup> Sulia langi ta iimola aga kasi mouri fuana i talana taifilia, ma langi ta iimola aga kasi mae fuana i talana taifilia. <sup>8</sup> Sulia lea gia mouri, gia ka mouri fuana a Lord. Ma lea gia mae, gia ka mae fuana a Lord. Nia naa, so gia ka mouri langi gia ka mae, gia na doo a Lord gi. <sup>9</sup> Sulia a Christ e mae, ma ka tatae uria na mouria haia ka Lord fuana tooa da mouri ma

fuana tooa da mae. <sup>10</sup> Haia, ma ni gamu na musi haitamana anilana mariko, muka too faasia na ketolana na waihaasi gamu. Haia, ma ni gamu na mu ania kwalukaela fanga, muka too faasia na sinatailana na waihaasi gamu. Sulia gia sui go tara gia ka take i naona God hai ka keto gia. <sup>11</sup> Sulia na Kekedelaa Aabu e bae urii, <<A Lord e bae urii, <Nia mamana nau naa God momouria. Ma nia mamana laugo urinae, tara na tooa gi sui gera ka boururu i naogu, ma tara gera ka haea i nau a God.>>> <sup>12</sup> Nia naa, gia haitamana tara gia sui go tara gia ka faarongo a God ana taa gi sui go na gia iilida.

*Langi musi faagaroo waihaasi gamu gi.*

<sup>13</sup> Haia, langi gia si keto gia kwailiu lau. Ma e diana fuana gia ka too faasia iililana tesi doo na tara ka aadea waihaasi gia ka aade ta'a. <sup>14</sup> Sulia na oofuofua nau fai nia Lord Jesus, nau ku haitamana diana ana langi ta fanga kasi bilia ma ka aabu. Sui lea ta iimola ka manata hasa teni fanga e bilia, tama e aabu laugo ana fuana. <sup>15</sup> Ma lea ta waihaasi gamu ka liobukonu sulia si taa naa mu ania, urinae tama langi musi faatania na rakedianalaa gamu fuana. Langi musi lugasia na fanga na mu ania ka labasia na iimola na Christ e mae usia. <sup>16</sup> Langi musi lugasia ta doo na mu manata haea e diana, daka hae ta'a ana. <sup>17</sup> Sulia na Initooa a God langi lau na doo sulia fangalaa langi gwoulaa. Ma lau ana, na Initooa a God, nia na doo ana o'oloo, ma fanualama, ma na eelee na Aanoedoo Aabu e falea. <sup>18</sup> Ma lea ta iimola ka rao fuana Christ urinae, a God ka eelee suli nia, ma tooa e'ete gi boro gera ka aalafaafia.



<sup>19</sup> Nia naa, gia ka hasi uria iililana na doo gi na falea fanualama ma ka faangasilana fiimanalaa gia kwailiu. <sup>20</sup> Musi tagalangainia na raa a God sulia fanga. Sui boro ana na fanga gi sui go e diana uria anilana, nia ta'a asianaa lea na fanga na mu ania ka faagaroo na waihaasi agamu. <sup>21</sup> Ma si doo e diana so musu ania ta marikona ta doo momouria, langi musu gwoufia ta gwoulaa rigita, ma musu iililana tesi doo lau na haitamana ka talaia waihaasi gamu uria aade ta'ala.

<sup>22</sup> Haia, muka too faasia na faarailaa sulia na manatalaa gamu sulia na fanga na teni tooa da haea e aabu. Ma lau ana, muka fooma go agamu sulia na doo nae gi. Haia, oilakea fuana iimola na e eele sulia nia ka iilia si taa naa nia haitamana e o'olo. <sup>23</sup> Haia, ma lea na iimola na manatana e ruarua sulia si taa naa nia ania, a God ka keto nia, sulia na iimola nae kasi roosulia na taa na nia manata mamana ana e o'olo. Sulia lea gia aadea ta doo na gia langi si haitamana nia o'olo, tama gia aade ta'a nae.

*Faaelea tooa ete gi, langi lau fuaga i talaga.*

## 15

<sup>1</sup> Haia, gia na tooa gi naa na fiimamanalaa gia gi e rigita e bobola fuana gia ka adomia ni tei gera na fiimamanalaa gera gi e makeso, ma langi gia si manata lau fuaga i talaga. <sup>2</sup> Ma lau ana, e bobola fuana gia ka faaelea na waihaasi gia haia ka diana fuada, eeri gia ka faarigitaa fiimamanalaa gera gi. <sup>3</sup> Sulia a Christ langi si iilia na doo gi uria faaelelana i talana. Sulia

na Kekedelaa Aabu e haea, <<Na bae tatagalaa gera fuamu e labasi nau laugo.>> <sup>4</sup> Na doo gi sui na da kedea la Kekedelaa Aabu, da kedea uria faatolomailaga, hai gia ka kwaimaasi ngado ana gwaromaabelaa ma na kwaiareia naa na Kekedelaa Aabu e falea fuaga. <sup>5</sup> Haia, ma nau ku fooma eeri a God na gwoufutana gwaromaabea ma na kwaiareia, ka aadea muka too ana tee manata go sulia muka roosulia a Christ Jesus, <sup>6</sup> eeri ni gamu sui go muka baelafea a God na Maa nia Lord gia Jesus Christ ana tesi lingee doo.

*Na Faarongolaa Diana fuana tooa maadiu gi.*

<sup>7</sup> Haia, muka gonitai gamu kwailiu, iilingia a Christ e gonitai gamu laugo. Lea mu iili urinae, tara tooa gi daka baelafea a God. <sup>8</sup> Sulia nau ku haea fuagamu, a Christ e lea mai la molaagali hai ka adomia tooa i Jiu gi, haia ka faatainia God tara ka faamamanaa na bae aalualua nia gi fuana koo gera gi, <sup>9</sup> ma ka aadea na tooa maadiu gi gera ka haitamana daka baelafea a God fuana si kwaimanataillaa nia. Sulia na Kekedelaa Aabu e haea, <<Ana si kada ku too fai nia tooa maadiu gi, nau tara kuka baelafe oe, ma kuka tango oe ana nguu gi.>> <sup>10</sup> Ma na Kekedelaa Aabu e bae lau urii, <<Gamu tooa maadiu gi, muka eele fai nia tooa a God gi!>> <sup>11</sup> Ma na Kekedelaa Aabu ka bae lau urii, <<Gamu tooa maadiu gi, muka baelafea a Lord, ma gamu tooa gi sui, muka baelafe nia!>> <sup>12</sup> Ma ana ta Kekedelaa Aabu lau, a Aesea ka bae urii, <<Tee wane ana kwalafaa Jesi tara ka lea mai, ma tara nia ka baita usia na tooa maadiu gi, ma tara gera ka fiitona suli nia.>>

<sup>13</sup> Haia, nau ku fooa eeri a God, na aadea gia ka too ana fiitoolaa, ka faaele gamu ma ka falea fanualama fuagamu sulia na fiimamanalaa gamu ani nia, eeri na fiitoolaa gamu ka bulao ana mamanaa na Aanoedoo Aabu.

*Aena taa na Paul ka kede rara'a.*

<sup>14</sup> Oote waihaasi nau gi, i nau ku haitamana diana ana na aabulolaa gamu e diana asianaa ma muka haitamadoo ma muka bobola uria na faatolomailaa gamu kwailiu. <sup>15</sup> Sui boro'i ana nia urinae, i laona kekedelaa nau naa nau ku bae rara'a sulia teni si doo gi na ku dooria faamanatatoo gamu ana. Nau ku bae rara'a sulia a God e aadafili nau sulia na rakedianalaa nia, <sup>16</sup> haia kuka aalua wane raoa a Jesus Christ uria raolaa fuada tooa maadiu gi. Nau ku rao iilingia ta fataabu baa ana ainitalongailaa ana Faarongolaa Diana faasia a God, haia na tooa maadiu gi tara daka iilingia ta kwaisuusia na a God e eele sulia, ma na Aanoedoo Aabu ka faafaalu gera. <sup>17</sup> Ma ana oofuofua nau fai nia a Jesus Christ, nau kuka lafe ana si raoa nau fuana a God. <sup>18</sup> Nau tara kuka bae rara'a sulia go ana taa gi naa Christ e iili ani nau uria talailana tooa maadiu gi fuana roolaa sulia God. A Christ e iilia si doo naa ana baea gi ma na aadelaa gi, <sup>19</sup> ma ana mamanaa ana doo kwaibalatana gi, ma na mamanaa ana doo ni kwelelaa ana gi, ma na mamanaa ana Aanoedoo a God. Ma ana lealaa nau faasia i Jerusalem uria i Ilirikum, nau ku ainitalongainia na Faarongolaa Diana teefou sulia a Christ. <sup>20</sup> Haia, ma ana hafalilana nau ku manata mamana ana a Christ, nau ku

dooria ainitalongainia na Faarongolaa Diana ana maefera gi na langi gera kasi rongoa ua sulia a Christ, eeri kusi iilingia ta wane na e haungainia ta beu i fafona fou ni ngangadolaa ta iimola ete e aalua. <sup>21</sup> Sulia na Kekedelaa Aabu e haea, <<Tooa na langi dasi rongo suli nia, tara gera ka rikia ma daka haitamana.>>

*Paul e manata uria daolaa i Rom.*

<sup>22</sup> Ma sulia nau ku abero uria ainitalolaa urinae la fera ete gi, nia na aadea kusi lea mai uria daotoolagamu. <sup>23</sup> Haia, ma ana si kada nae, nau ku faasua naa na raoa nau gi see la maefera naa gi, ma sulia e tau asianaa na nau kuka dooria lealaa na mai seenaa siagamu, <sup>24</sup> nau ku manata na haia kuka lea mai siagamu ana si kada naa. Ma ana si kada kuka eele sulia na toolaa nau fai gamu, nau ku dooria ku tasa dongaa ana lealaa nau uria i Spen, ma nau ku dooria muka adomi nau uria lealaa nau ana fera nae. <sup>25</sup> Haia, ana si kada nae ua, nau ku lea fasi uria i Jerusalem uria adomilana tooa a God gi i seenae. <sup>26</sup> Sulia na soefaataia gi i Masedonia ma i Gris, gera manata nia diana fuada uria falelana si malefo uria adomilana tooa na da manata mamana na da siofaa ma daka too i Jerusalem. <sup>27</sup> Ma si manata nae na doo gera i talada. Ma ka urinae boro, nia bobola fuana gera ka adomida. Sulia na tooa i Jiu gi gera ado na ana si doo diana gi fuana aanoedoo fai nia na tooa maadiu gi, ma e diana fuana tooa maadiu gi gera ka ado ana si doo diana gi fuana noni fai nia na tooa i Jiu gi. <sup>28</sup> Haia, ana si kada ku faasua ana raoa naa uria falelana na malefo na gera oogua fuada sui, nau

tara kuka lea naa uria i Spen, ma tara nau ku liu siagamu ana lealaa nau. <sup>29</sup> Kada ku dao mai ana siagamu, nau ku haitamana tara kuka ado fai gamu ana doo diana oro gi faasia a Christ.

<sup>30</sup> Oote waihaasi, sulia a Lord gia Jesus Christ ma i sulia na rakedianalaa na Aanoedoo Aabu e falea fuaga, nau ku gani gamu muka fooma rigita fai nau eeri a God ka adomi nau. <sup>31</sup> Mu fooma haia a God ka adomi nau hai na tooa gi i Judea na langi dasi manata mamana, langi dasi haungi nau, ma muka fooma laugo eeri na tooa a God gi i Jerusalem gera ka eele sulia na raolaa nau ana adomilada. <sup>32</sup> Nia naa, lea so na kwaidooria God, ana si kada kuka faasua na raolaa nau i Jerusalem, nau tara ku lea mai siagamu fai nia si eelelaa baita, ma tara kuka mamalo diana fai gamu. <sup>33</sup> Haia, nau ku fooma eeri a God na gwoufutana fanualama gia ka too fai gamu sui. Amen.

*Baelaa diana a Paul fuana teni tooa i Rom.*

## 16

<sup>1</sup> Haia, nau ku doori bae diana sulia na waiwane gia ni Fobe baa e rao la soefaataia i Kenkarae. <sup>2</sup> Si kada nia tara ka dao mai siagamu, muka gonitainia sulia na fimmamanalaa nia ana a Lord, sulia tooa a God gi bobola gera ka iili urinae. Ma muka adomia ana tesi doo na nia e dooria, sulia nia e adomia tooa oro gi ma i nau laugo.

<sup>3</sup> Haia, nau ku falea baelaa diana fuana ni Prisila na Akuila na daaro rao fai nau fuana a Jesus Christ. <sup>4</sup> Ana si kada daaro adomi nau

ana, garangi gera ka haungi daaro. Ma sulia si doo naa, nau ku baelafe daaro asianaa. Ma langi lau taifili nau, ma na tooa maadiu gi sui na gera manata mamana gi laugo, gera baelafeda. <sup>5</sup> Haia, ma nau ku falea baelaa diana laugo fuana tooa na da manata mamana ma daka oogu la luma daaro uria foomalaa fuana a God.

Ma nau ku falea baelaa diana laugo fuana Epaenetus, na ruana diana nau. Nia na wane totongenao na e manata mamana ana Christ i Asia. <sup>6</sup> Ma nau ku falea baelaa diana laugo fuana ni Mary, aai baa e rao rigita fuagamu. <sup>7</sup> Ma baelaa diana laugo fuana Andronikus ma a Junias, na roo wane Jiu gi iilingi nau na da too fai nau la beu ni kanilaa. Ma ni daaro roo wane da manata mamana ana Christ suifetei ni nau. Ma na aposol gi da haitama daaro laugo.

<sup>8</sup> Na baelaa diana nau fuana Ampilatus, na ruana diana nau sulia na fimmamanalaa gemere ana a Lord. <sup>9</sup> Na baelaa diana laugo fuana Urbanus, na wane raoa fai gia fuana a Christ. Ma na baelaa diana laugo fuana Stakis, na ruana diana nau. <sup>10</sup> Ma baelaa diana fuana Apeles, na e faamamana na manata mamananalaa nia ana a Christ. Ma bae dianalaa fuana Aristobulus fai nia na aebara nia. <sup>11</sup> Ma baelaa diana fuana Herodion, ta wane Jiu iilingi nau. Ma baelaa diana laugo fuana tei gera na da manata mamana la aebara a Narsisus.

<sup>12</sup> Haia, na baelaa diana nau gi fuana Trifaena ma Trifosa, na daaro rao fuana a Lord. Ma na baelaa diana laugo fuana ruana nau Persis, na geni rao asianaa fuana a Lord. <sup>13</sup> Nau ku falea baelaa diana nau gi fuana Rufus, wane rao diana

fuana a Lord. Ma baelaa diana laugo fuana tee nia Rufus, na e aade diana fuagu iilingia ta wela ana. <sup>14</sup> Baelaa diana nau gi fuana Asinkritus, Flegon, Hermes, Patrobas, Hermas, ma na tooa gi sui na gera manata mamana ma gera ka too fai gera. <sup>15</sup> Baelaa diana gi fuana Filologus ma Julia ma Nereus ma wai wane nia ma fuana Olimpaspas fai nia na tooa God gi sui na gera too fai gera.

<sup>16</sup> Haia, ana si kada gamu ka riki gamu kwailiu, muka faatainia na rakedianalaa gamu fuagamu kwailiu. Haia, ma na soefaataia a Christ gi sui da falea kou na baelaa diana gera gi fuagamu.

### *Bae abolaa.*

<sup>17</sup> Oote waihaasi nau, nau ku haea fuagamu, muka aadaada eeri na tooa gi na iili uria na tokitalaa gamu dasi labasia na fimmamanalaa gera tooa gi ma daka faatolomainia teni doo na e lea ete faasia na faatolomailaa mamana na gamu manata mamana ana. Muka too tau faasida. <sup>18</sup> Sulia ni tei na gera iili urinae gi, langi dasi rao go fuana a Christ a Lord gia, ma gera rao go ada fuagera i talada. Ana baelaa diana gera gi fai nia na baelaa ni gaea, gera ka sugea tooa gi na langi dasi haitamadoo ua. <sup>19</sup> Tooa gi sui da rongoa na fimmamanalaa gamu ana Faarongolaa Diana nia ngado asianaa. Ma sulia si fimmamanalaa gamu, nau kuka eele asianaa suli gamu. Nau ku dooria fuana muka liotoo sulia taa naa e diana, ma muka lalafusidoo sulia taa naa e ta'a. <sup>20</sup> Haia, a God na gwoufutana na fanualama gia, tara nia ka ali'ali uri magalana a Satan farana ae gamu.

Nau ku fooma eeri a Lord gia Jesus ka tasa dongaa ana rakedianalaa nia fuagamu.

<sup>21</sup> Haia, a Timothy, na wane na e rao fai nau, e falea baelaa diana nia gi fuagamu. Ma Lusius ma Jason ma a Sosipater, na wane Jiu gi iilingi nau, gera falea na baelaa diana gera laugo fuagamu.

<sup>22</sup> Ma i nau Tertius, na wane na ku adomia a Paul uria kedelana na baelaa naa gi, nau ku falea kou na baelaa diana nau fuagamu sulia na manata mamanalaa gia ana a Lord.

<sup>23-24</sup> Haia, ma a Gaius, na wane na ku too siana ma na tooa da manata mamana gera ka lea mai uria oogulaa i luma nia, nia e falea kou na baelaa diana nia gi. Ma Erastus na wane aadasulia malefo la maefera baita nae fai nia waihaasi gia a Kuartus, daaro falea na baelaa diana laugo fuagamu.

### *Foomalaa i'isi ni baelafea.*

<sup>25</sup> Gia ka hae initoo ana God, sulia nia haitamana ka faarigitaa na fiimamanalaa gamu gi. Nau ku bae urinae laugo ana si kada ku ainitalo ana na Faarongolaa Diana sulia Jesus Christ, ma nia iilingia laugo ana na faatolomaia na a God e haufinia i nao tau mai. <sup>26</sup> Haia, ana si kada nae, na faatolomailaa nae, a God ka faatania mai ana kekedelaa gera profet gi. Ma sulia na kwaieresilaa God na e momouria firi, na faatolomailaa naa ka tagala fuana tooa gi ana fera gi sui eeri na tooa gi sui gera ka manata mamana ana ma gera ka roosulia laugo.



<sup>27</sup> A God, na nia taifilia a God, ma nia go ana e liotoo baita ka tasa, gia ka baelafea ana Jesus Christ too ka tau! Amen.

## **Lau New Testament**

### **Lau: Lau New Testament (New Testament)**

copyright © 1992 Wycliffe Bible Translators, Inc.

Language: (Lau)

Contributor: Wycliffe Bible Translators, Inc.

All rights reserved.

2020-11-23

---

PDF generated using Haiola and XeLaTeX on 21 Feb 2024 from source files dated 29 Jan 2022

04ff0905-6192-57c6-8d94-302e2c78a1da